

አንፋር ዓም ኦዲተር ኤረትሮፕ ተኔሂል ልትሀየቦ



መክተብ ዓም ኦዲተር ኤረትሮፕ ምስል “መሕበር ውቁላት መአሰሳት መትሃማየት እንግሊዝ ላተን ድወል

አፍሪቀ፣” ቀደም እለ እብ አሳሰለ ትበጸሐት እትፋቅየት፡ ዲብ ዐድነ ሐዲስ አግቡይ ፈጽሞ ኦዲት እግል

ልትአንበት ለአመመ ተኔሂል እግል አንፋሩ ለሀይብ ህለ። ዲብ እለ ምን 31 ጁላይ እንዴ

አንበተ ክልኤ ሳምን ለልአተላሌ ተኔሂል፡ ዲብ አግቡይ መራቀበት መአሰሳት ማልየት፡ ዲብ ወራታት ኦዲት ለሳድፍ መታክል ወአግቡይ ባልሐቱ፡ ደለል ኦዲት ወአብሳር አከቦት ሐብሬ፡ እብ ኑዕየት ልግበእ ወቅያሥ ለትትአከብ ሐብሬ፡ ወሳይቅ ወአግቡይ ጽብጠቱ ወፍገራት ኦዲት ዲብለ ልብል ውበዕድ አጃንዳት ህድግ ገብእ ህለ።
አግደ መመቅረሓይ መክተብ ዓም ኦዲተር ኤረትሮፕ አሰይድ ገረዝማሄር ገብረመድህን ዲብለ ቀደመየ ከሊመት መክሰቲ፡ ኤረትሮፕ ክምሰል ክፋል መጅተመዕ ዐለም ዲብ ወራታት

ኦዲት ብጽሕት ለህሌት ደረጃት እግል ብጽሕት እብ ደረጃት ደረጃቱ ልጠወር ለህለ ተኔሂላት እበ ሐሰት ልትከደም እቱ ክምሰል ህለ እንዴ አሸረ፡ ህደፍ ናይ እለ ገብእ ለህለ ተኔሂል ህዬ፡ ፈጽሞ ኦዲት እብ በቃዕቱ ወሰፋየቱ እግል አከዶት ክምሰልቱ ሸርሐ።
ለተኔሂል ምህነት፡ ምን ኡጋንዳ፡ ኬንያ ወቦትሰዋን እበ መጽአው ሰብ መቅደረት ኦዲት ቱ ልትሀየብ ለህለ።
ኤረትሮፕ ዲብለ ሐልፈት ሰነት እበ አርኤቱ ለሐሰ አግቡት መራቀብት፡ እበ መሕበር ክምሰል ትሰርጌት ልትዘከር።

19ይ መሀረጃን ኤረትሮፕን ሰካን ድወል ሰካንዲናቭየ ልትጋየሰ

19ይ መሀረጃን ኤረትሮፕን ሰካን ድወል ሰካንዲናቭየ፡ ምን ዮም 27 አሰክ 30 ዩልዩ እት ሰቶክሆልም እብ ገበይ ናይረት ክምሰል ትሰርገሉ፡ ምን ኣካን ለበጽሐተነ ሐብሬ ተአፍህም።
እተ እብ ወዚር ኻርጅየት አሰይድ ዑሰማን ሳልሕ ለትከሰተ ወእብ አላፍ ለልትዐለቦ መዋጥኒን ለሻረከው እቱ መሀረጃን፡ መሰሉል መመቅረሓይት ልጅነት ዓያድ አሰይድ አለም ተኽሌገርጊሽ እተ አሰመዐየ ከሊመት፡ መሀረጃን እግል ሕፍዘት ሰያደት ወዓዳት አሀምየቱ ዛይደት ሰበት ተ፡ እብ መትሐሳር ዐቢ ክምሰል ሰርግልወ ወደሐ።
መሰሉል ሸኡን ተንጊዚ ሰፋረት ደውለት ኤረትሮፕ እት ሰካንዲናቭየ፡ ተአምርተ ናይለ ኤርትሮፕን እት ዓዳቶም ወሀውቶም ለቦም ተ ሕሽመት ወፈተ ክምቱ ሐበረ።

ወዚር ኻርጅየት አሰይድ ዑሰማን ሳልሕ፡ እግል ሓድር ተዩልል ሰያሰት፡ ዲብሎማሰየት ወእቅትሳድ እበ ኸሰሰ ለሀበዩ ሰሚናር፡ ዋይዲባት እግል አፍሽሎት ወወጠንያይ በራምጅ ዐማር እግል ልትሰርገል እብ ሰዳይት ሸዑ ወሕኩመት ለትሰርገ በራምጅ ወፍገራቱ እት ወዴሕ፡ ለበራምጅ እብ ከማሉ እግል ልትዐወት አተላላይ መዳፍዐት ወመቅራሕ ለገብእ ጅህድ ሙሁም ክምቱ ወደሐ።
እት መዲድ ዐዳለት እጅትማዕየት፡ አከዶት ከደማት እጅትማዕየት ውብንየት ቅወት በሸር እብ ብዝሐ ወነውዕየት አውለውየት ለትትሀየቡ በራምጅ ክምቱ ለሸርሐ ወዚር ዑሰማን፡ እት ኻርጅ ለነብር መዋጥኒን እንበት እግል ህለ ናይ ምህናት ወእቅትሳድ



መቅደራት እት መሳልሕ ወጠንክ አውዐሎት ዝያድ እግል ልተላሌ ክም ቱ አትፋቀደ። መብተርከት

እብ ተረቶም፡ ሰዋልፎም እቱ እንዴ ሓፈዘው መሳልሕ ወጠን እት አድመኖት ክም ከድሞ አከደው። እግል አርበዕ አምዕል

ለአተላላ መሀረጃን፡ እብ ለትፈናተ መሓደራት፡ በራምጅ መትፋግጂ፡ ዕፌ ዓዳት ውበዕድ ነሻጣት እቡ ጋምል አሰመኹ።

መሕበር ሸባን ኤረትሮፕ፡ በራምጅ ቀይም ወኤታን ሐዲስ ለአፈግር



መሕበር ወጠን ሸባን ወደረሰ ኤረትሮፕ፡ ምን ዮም 27 አሰክ 29 ዩልዩ እት አሰመረ እት ወደዩ እጅትመዕ፡ ናይ ሰር

ሰነት ወራታቱ እንዴ ጌመመ፡ እት ፈዓልየት በራምጅ ሐዳስ እስትራተጅየት ስታት ሸቅል ሀድገ።

እት መሰሉሊን አቅሳም አቃሊም፡ እብ አሳሰ ናይ ሐምስ ሰነት ትልም እስትራተጅየት ሸቅል እግል ፈዓልየት ለአንበተ በራምጅ ወሄራሩ እበ ኸሰሰ ተቃሪር

ለትቀደመ እቱ እጅትመዕ፡ እት ረበየት፡ መትነዛም ወዐንደቅት አጅህዘት፡ እብ ምህናት ለትደሕረው ሸባን፡ መሻረከት ሸባን እት ወራታት ዐማር ክምሰለሁመ ዕላቃት መሕበር ምስል ናይ መንጠቀት ወእድንዩ እግል ወቀሎት ለትሰርገል ካድም እብ ፋይሕ ተሀደገ እቡ።
ርኢሰለ መሕበር አሰይድ ሳልሕ አሕመዲን እተ አሰመዐየ ከሊመት፡ መሕበር ሩእየቱ ወአሀዳፋ እግል ለአክድ እት ለትፈናተ አውካድ ትልም እስትራተጅየት እት ለአፈግር ሸቄ ክምሰል ጸንሐ እት ሸሬሕ፡

እግል ሓድር መታክል ወጠለባት ሸባን እት ወግም እንዴ አተ፡ ለህለ አብነት መትሐሳር እንዴ ተሀየበዩ ለልትሐመድ ካድም ክምሰል ትሰርገሉ፡ እት ወራታት መሕበር ለተአትሐዜ ዐቦት ወሄራር እግል ልምጸእ ለለአሸር ክምቱ ህዬ ሸርሐ።
እት ደንገበ እተ ተሌ ካልኣይ ክፋል ናይ እለ ሰነት፡ ፈዛዐት ወመሻረከት ሸባን እግል ወቀሎት ዝያድ እግል ልትከደም፡ እት ኩልያት ተኔሂል ካድር እግል ልትሀየብ፡ እት መዳርሰ ወኩልያት ለልትሀየብ መሓደራት ወተውዕያት እግል ልደቀብ እት መፋሀመት ትበጸሐ።

ማይ-ነፍሐ፡ መብክ ሐዲስ ልትባኔ



ሕክማት ኤሪትሪያ ወጀምራርያት ቻይና ዲብ ጃላይ 2014 እብ ፈርመው እተ እትፋቅዮት፡ ዲብ ባካት ማይ ነፍሐ እብ ዝያድ 25 ሚልዮን ዶላር ናይለ ትሸቀ አወላይ ገጽ መብክ ሐዲስ ኩልየት ዕሉም ዓደት ተሰሊም ዮም 27 ጃላይ ገብአት።

ዲብለ ውቁላም ሰብ ሰልጠት ሕክማት ወጀብህት፡ ሰፊር ቻይና ዲብ ኤሪትሪያ ርኢስ ናይለ መብክ ለሸቄት ሸሪክት ቻይና ወመደኒያይ ሀንደስት ለሐድረው እተ መናሰበት፡ ወዘር ተዕሊም አሰይድ ሰመሬ ርኢሶም ዲብለ ቀደመዩ ከሊመት፡ ለመብክ ተኣምርተ ናይለ ፍንጌ ሕክማት ኤሪትሪያ ወቻይነ ለህሌት ዕላቀት ትርድት ክምሰልቱ ሸርሐ።

ሰፊር ጀምራርያት ቻይና ዲብ ኤሪትሪያ ሚስተር ያንግ ዚጋንግ እብ ጀህቱ፡ ለመሸፋዕ አተላላይ ናይለ ፍንጌ ሕክማት ኤሪትሪያ ወቻይነ ዲብለትፈናተ ወራታት እብ ዓመት፡ እት መጃላት ተዕሊም ህዩ እብ ፍንጌይ ትገብእ ለህሌት መሳደየት ክምቱ እንዴ ሸርሐ፡ ዲብ ወራታት ብንዩቱ ፍንጌ ኤሪትሪያን ወሲኒዩን ሸቃለ እግለ ትረአ ወቀይ ወመዕጸም ሐመደ።

ናይብ ርኢስ ቅደይ አካዳምየት ኢንሰቲትዩት ቴክኖሎጂ ኤሪትሪያ

ፕሪፌሰር ገብረሂወተ መድሃኔ እብ ተረቱ፡ ለዘመናይ መብክ፡ ዲብ ዕልማይ መትመራማር ለትሻርክ መቅድረት ኡዳም እብ ብዝሐ ልግበእ ወትዕየት ዲብ ወቀሎት ዶር ዐቢ እግል ለአግዴ ክም ቀድር ዳምን ክምቱ ሸርሐ።

ርኢስ ሼርክት ቻይና ወመደኒያይት ሀንደስት ሚስተር ዩዋን ሊ ህዩ፡ መአሰስቶም ዲብ ወራታት በራምጅ ዐማር ወጠን ኤሪትሪያ ዶረ ትቀደም እብ ሀለዮተ ለትሰመዐዩ ሸዑር እንዴ አሸረ፡ ዲብ ብንዩትለ ኩልየት መሰል ሰኔት ለገብአው ኤሪትሪያን ሸቃለ ህዩ ሸሃዳት ሀቡ።

እሊ እት 37,979 ምትር መረበዕ ለትብኒ ሴዕ ብሎካት ለከምክም መብክ፡ ናይ እዳረት፡ ስታፍ ሙዐልሚን፡ ለባራቶሪ ወአካን ተጅሚዕ ለገብእ ቃዓት፡ መክተባት፡ አፍሱል ተድሪስ ክምሰልሁመ ብዕድ ናይ ተዕሊም ወራታት ለልሰርገል እቱ ቅረፍ ለሸምል ቱ።

እሊ ዲብ ሳልፋይ ገጽ እግል ኩልየት ዕሉም ብኩይ ለህለ መብክ፡ እግል ሐድ 6 አልፍ ደረሰ ክድመት እግል ለሀብ መቅድረት ለቡ እት ገብእ፡ ዲብ ካልኣይ ወሳልሳይ ገጽ ህዩ፡ እግል ኩልየት ሀንደስት ወተዕሊም ለክድም መባኒ እግል ልትሸቄ በርናምጅ ህለ።

መህረጃን ኤሪትሪያን እት ብሪጣንዩ ልትሰርገል

16ይ መህረጃን ኤሪትሪያን ሰካን ብሪጣንዩ፡ ወዘር ካርጅየት አሰይድ ዑስማን ሳልሕ ሰፊር ኤሪትሪያ እት ብሪጣንዩ ወቅብለት አዩርላንደ አሰይድ እስቲፋኖስ ሀብተማርያም፡ መሳኒት ኤሪትሪያ ውላድ ካርጅ፡ ክምሰልሁመ ምን ብሪጣንዩ ወብዕዳት ድወል አርብ ለመጽአው ምዋጥኒን ለሐድረው እቱ፡ ምን 21 አስክ 23 ጃላይ ዲብ መዲኔት ለንደን እብ ነያረት ዛይደት ትሰርገለ።

ዲብ እሊ እግል ሐሊት መትካም ወውሕደት ኤሪትሪያን ክምሰልሁመ እግል ሀውዩቶም ወዓዳቶም ለቦምተ ሕሽመት ለለርኤ መህረጃን፡ ምን መዳይን ማንቸስተር፡ ሊድስ፡ በርሚንግሃም፡ ሊቨርፑል፡ ሸፊልድ፡ ኖቲንግሃም፡ ኮቨንትሪ ወኒውካስል ለመጽአው እብ አላፍ ለልትዐለቦ ምዋጥኒን ሻረከው።

ወዘር ካርጅየት አሰይድ ዑስማን ሳልሕ፡ እግል ምሽተርክት ዲብለ ወደዩ ሰሚናር፡ ሕክማት ኤሪትሪያ ዐዳለት እጅትማዕየት

እግል ትምደድ ለትተበዕ፡ አግደ ህዩ ዲብ ረዩም ድዋራት ለለአቀምት ወራታት ዐማር ለለአትናይ ፍገራት ትትረከብ ምኑ ክምሰል ህሌት እንዴ ወደሐ፡ እግል ትርደት መዳፈዐት ምዋጥኒን ድድ ጸብኢት ሐመደ።

ሰፊር ኤሪትሪያ ዲብ ብሪጣንዩ ወቅብለት አዩርላንድ አሰይድ እስቲፋኖስ ሀብተማርያም እብ ጀህቱ፡ ዲብለ ደውለት ለነብሮ ምዋጥኒን እሊ ወጠኒያይ ተጀምዕ እግል አገመኡት ሰነት ሰነት ለለርኤ ወመሻረክት ወኢመትሐላል ልኢክት ዐባይ ክምሰል ቡ እንዴ አሸረ፡ በራምጅ ክምክምት መዳፈዐት እግል አደቀቦት እግል ወደወ ለህለው ወቀይ ህዩ ሐምዴሁ ቀደመ።

“መህረጃን፡ ዲብ ሕፍዘት ወመትወራራስ ወጠንዩት ወቅዩም መጅተመዕ ተረት ዛይደት ቡ” ለቤለ ርኢስ ጃልየት ኤሪትሪያን ሰካን ብሪጣንዩ አሰይድ አሕመድ መሐመድ መሕሙድ፡ ተሐድያት ዐለዮ እብ ውሕደት እግል መትባጣሩ ሰኒ ምህም ክምሰልቱ

ወደሐ። ዲብለ መህረጃን ለሻረከው ወካይል ወመሳኒት ኤሪትሪያ ወኤሪትሪያን ህዩ፡ ናይ ተእዩድ ልኢኮታት ቀደመው።

ለመህረጃን፡ ወሳኢል እዕላም ወዲብሎማሰየት ሸዑብ፡ መሸርዕ ሚራስ አስመረ ወብዕድ ለልብል አርእስ እብ ተሀዩበዩ መሓዳራት ወሸፊሕ፡ እግል አጀኒት ለለአትፋጌዕ በራምጅ፡ ወራታት ዓዳት ወፈን፡ ንቃሽ ሸባን፡ ጅግረ ርያደት ክምሰልሁመ ጎይለ ዳምቅ ዐለ።

ዲብ ወራት ብዕደት ዶል ንትዐዴ፡ መሕበር ወጠን አዋልድ አንሳት ኤሪትሪያ ፈሬዕ ኩዌት፡ መትካሙ እግል አደቀቦት መሻረክት አንፋሩ ዲብ ወራታት ዐማር እግል አተረዶት ለአመመ እጅትመዕ ወደ።

ርኢስትለ መሕበር አሰይደ ምልእቱ ድጌ ዲብለ ቀደመተ ከሊመት፡ መጃምዐን እንዴ አደቀበዩ፡ ዶረን ዲብ ወጠኒያይ በራምጅ ዐማር ወመዳፈዐት ወጠን ክምሰል ለአዘይደ ሸርሐት።



አንፋር 31 ደውረት ክድመት ወጠን በራምጅም ለአካብቶ

ናይ ካልኣይት ደረጀት ምህር አካዳምየት እግል ለአትምሞ ዲብ 31^ይ ደውረት ክድመት ወጠን እግል ልሻርኩ ምን ክሉ አቃሊም አስክ ሳወ ለትከረው አንፋር 31^ይ ደውረት ክድመት ወጠን ምን 25 ጃላይ በራምጅም ረስሚ አምበተው።

ዲብለ ዓደት፡ ቃእድ መርከዝ ተእሂል ክድመት ወጠን ኮሎኔል ደብሳት ግደ ዲብለ ሀበዩ ሸሬሕ፡

ክምሰል ክሎም ቀደምም ዲብለ ዐለዩ 30 ደውለት ለትሰሐለው ሸባን፡ እግል ፋዩሕ ናይ ተእሂል ምህር በራምጅ እብ ፍቲ ወምርወት እግል ልትከቦቱ ክምቱ ደማንቱ ሸርሐ።

ኮሎኔል ደበሳይ እንዴ አትሉ፡ ለሸባን ወቅቶም እብ ዋጅብ እንዴ ረተበው፡ እግል ልትሀዩብ በራምጅ እት ፍዕል እግል ልተርጃሙ መሻረክት ዛይደት እግል ለርኤ ሐቀለ ትፋኑ ሳዋመ እብ ክሉ

አጅሀዘተ እበትወቀለት ደረጀት ዱሊት እሎም ክምሰል ህሌት ወደሐ እሎም።

አንፋር 31^ይ ደውረት ክድመት ወጠን፡ ግረ ናይ ሐድ ወሬሕ ተድራብ፡ ርቱብ ናይ 12 ፈስል አካዳሚያይ ምህር ክምሰል ለአስተብዱ ምን መክተብ ስታፍ ተዕቢኣት ወሐብሬ መርከዝ ተእሂል ክድመት ወጠን ለትረከበት ሐብሬ ተአሸር።

ኤሪትሪያ ጽሓፍ

ክል አርቡዕ ለትጠ'በዕ ጀሪደት

መዳልያይ፡

መሐመድ እድሪስ መሐመድ

ናይብ መዳልያይ፡

ኣድም ሳልሕ (አቡሐሪሽ)

ለይ-ኣውት፡

ፋጥና አደም

ዘህረ ዐሊ

ተለፎን፡ 121797

ፋክስ፡ 127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284

ዲብ አፍዐበት በቃዕት ደረሰ እግል አደቀቦት ልትጋዩስ

ዲብ አፍዐበት በቃዕት ደረሰ እግል አደቀቦት፡ እግል ደረሰ መአንብታይት ወምግባይት ደረጀት ወሱክ ናይ ከረም ምህር ልትሀዩብ ህለ።

እሊ 257 አዋድ አንሳት ለብእቶም 550 ደረሰት ልትሀዩብ ለህለ ምህር፡ ዲብ ህግዩ እንግሊዝ ወሕሳብ ለረከዘ እት ገብእ፡ ዲብ መአሰሳት ተዕሊም፡ ዓፍየት

ዐድል ወሐርስ እብ ሸቄ ወእብ ደረሰ ኩልየት ገብእ ለህለ በርናምጅ ክምቱ መስኡል መዳርስ ዲብ ምዴርየት አፍዐበት እስታዝ ዐብዱላሂ ሳልሕ ሐበረ።

እሊ ምን ደዓም ለአንበተ በርናምጅ፡ ፍገራቱ ለለአትናይት ክምሰልቱ ለአሸረ እስታዝ ዐብዱላሂ፡ ዲብ ምስተቅበለ እብ ዋጅብ እንዴ ትጌመመ እግል ደረሰ ካልኣይት ደረጀትመ

ክምሰል ልተላሌ እግል ዲብ ተድሪስ ፍሩራም ለህለው ሙደርሲን ሐመደ።

ደረሰ ዲብለ ሀበው ረኣይ፡ ለከሰበው ምህር ሴድያይ ክምቱ እንዴ አሸረው፡ ለናይ ዕርፍ ወቅቶም ዲብ መስለሐቶም ለአውዐለው ሸቃለ ሕክማት ወደረሰ ኩልየት፡ እግል ወደው መሰል ሰኔት ዶርም ሐመደ።****

መሐጠት ባስ

ኬትባይ ዐብደሊ መ/ዐሊ (መዐልም)

1ኛ ክፋል

አርድ ምነ ዶል ለያፈራጅ ቤለያተ፡ አስክ ወክድ ለዎሮ መሰለሰ ላሊ ትብጹሕ መሐጠት ባስ ዕርፍ አለበ ወፊዋን።

ዎሮት ገይሰ ወዎሮት መጽእ፡ ገሌ ለዐርግ ወለገሌመ ልትከሬ፡ ገሌ ሰፈር ርዩም ስቱት ለአብሐር እግል ልትዐርሬ ወገሌመ እብ ጥያራት ሳፍር ክምሰል ሆባይ እት ሰመዋት እት ነፍር አስክለ ኣሙ ለህለ ኦካናት እግል ልብጸሕ ህዩ ልስኢ ወልተምኔ።

ወድ ሚን ኣደም ህዩ ሰሩ ዲብ ሀማት ወሽቀላት ኩሩይ ዲብ እንቱ ትርእዩ ለነፍሱ ፍንቲት ምን ዐዱ እት ተአቤ፡ ገሌመ ልውቅ ትርእዩ እግል ሽፍሩ ልእቱ ወምሰል ዐዱ ወውላዱ እግል ለአምሐብር ወለሓኬ።

ሰር ሰብ ጋሪት ቅርብት ቱ ለእብ መልሃዩ አመት ሰፈሩ ወዴ፡ ወሰርመ ገሌ ዎሮት ሰብ ሻማት ቱ በዐል ፍንቲት ሚ ለአስትህል ልትፈሌ። ላኪን ሰፈር ሐቆ ተአምም ላተ ክሉ አስክለ አሙ ለህለ ዳዩ ለሀረክርክ ከእብ እገር፡ መጽዕን ዘበናይ መዋሰላት ባሳት ወበዋቢር ጅላብ ወጥያራት አስክለ አመመዩ ልትባደር።

አይወ መሐጠት ባስ ክሉ አስክ ለአውሀሌ፡ ለሱግ ለአምም ወለብሩር፡ ለአስክ ጥያራት ገይሰ ወመሐጣት ተካሲ ክሉ ምን መሐጠት ባስ ቱ ለሳፍር ወዲበ ልትከሬ። መሐጠት ባስ ክሉተ፡ ዴማት ሰፈር አስክ ክሉ፡ ክሉ ለአቅሎ እበ ወልደሬ፡ ክሉ ልሰዴ አስክ ወለውሀሌ። እብሊ ህዩ መሐጠት ባስ ዲመ ኢትጨምቤ ሰር እብ ሰፍ ወሰርመ እብ ዎርዎሮ ልጸዐን ወልትከሬ።

እት መሐጠት ባስ ብዙሕ ትርኢ ወትሰሚዕ። ዴማት ከበር ሳብት ወቤለቤለው፡ ዴማት አምር ሕድ፡ በዐለ ሰፈር ህዩ እስቡሕ ምድር አስክ ለሀቶቱ። ላመ ምን ለህበት ጸሩ ለነብር ካይን ወሰራቅ እደዩ እት አጅባብ ብዕዳም እግል ልላውሽ ህቱመ ክምሰል በዐል ሰፈር አስክ መሐጠት ባስ ለአገውሕ ወልትወረብ። እንዴ አትሃመለ አጅባብ ጸሩ ለሐናፍል ወቀናፍል ወክምሰል በዐል ሽቅል ህቱመ ዶል ለዐርግ ወዶል ሓሪት ልትከሬ።

መሐጠት ባስ ዴማት ክሉ ወቀይ እት እንተ ትውዕል ወትትመዩ። እሊ ሐዳይ ምነ ብዙሕ ወቀይ ወወራት ቱ እንድኢኮን ዲበ ለልትረኢ እሊ እንዴ ትበህለት ኢልትወሰፍ፡ ብዙሕ ህለ ዲበ ለልትበህል ወልሰተር፡ ።

ህተ፡ ክል ዮም ምን ሳዐት ሰቦ ናይ ዲመ ዐሚሊ አው ዘበነ ትትከበት ወትሳሬሕ። ዲብ መካትብ ለሸቁ መንደሊታት ወሽበንርብ ለሀይ ከምን ለሀይ ለልትሐሬ አስክ ለአውሀሌ። ህቶም ሳዓታት ሽቅል እግል ኢልሕለፎም ክልዶል ሰዓታቶም እት ለአቀምቶ እት መሐጠት ባስ እንዴ መጽአው ድማኖም ወድገለዎም እት ለአትቃምቶ፡ ለአካን ሽቅሎም ለአበጽሖም አው ምን ሽቅሎም አስክ ቤቶም ለበልሶም ባስ እግል ልርከዐ

ክምሰል ሆባይ እት ክል እንክር ዲብ ለአትቃምቶ ትርእዮም።

መርየም ምን እሎም እትሊ ሰዓታት እሊ እት መሐጠት ባስ ለተአውሀሌ ዘበነት ተ።

መርየም ሐመልማል እትቅይሒን ለትነትል፡ ብትነት ብዋረተ ረዶም ኢኮን ወሐሚር ምግባይት፡ አክል ሕድ ታክዮት ለኢተዐነት፡ ጠርቡሽ ኣንፈ ማሬ፡ አሸዱገ ራዊ ወሙሉእ፡ ጭገረ ሸጢፍ ዘነብ ፈረሱ፡ አንደበ ልጡም ወገጸ ባርህ ሽንብሬበት ተ። ዕምራመ ፍንጌ ዐስር ሰማን ወዕስረ ሰበት ቱ፡ ፍንጌ ንእሽ ወሽንገላት ሰበት ገብአት ህዩ ክሉ ዲብሊ መሐጠት ባስ ለመጽእ ሕውርር እት ልብል ልቡ ለኢትሰልብዲ ይዐለ። ለአዳም ህዩ ምን ዓቅቢትለ ልታከዩ ባስ ዝያደት እብ ልቡ ወዕንቱ እግል መርየም ዲብ ለዐቅብ ወለአቀምት ዲብ ትርእዩ፡ መርየም ሴሩ እግል ኢተረሰዑ ትፈርህ።

አይወ መርየም ዕምር ለእቱ ትርኢ ወትትረኢ ወቅት ግርመተ ወዓፊህ ወክሉ ንዩተ ዎሮት ህተ ለትፈትዩ ወዎሮት ህቱ ለልሸህ እቱ ዕምር ሰበት ህሌት ለአስክ ለአትቃምት ዕንታት ኢወሐደ።

መርየም እት ሽቅል ሕኩመት ሰበት ትሸቁ እትሊ ወክድ እሊ ዲብ መሐጠት ባስ ትትወሐዋ። እብ ምጽአተ ክሉም መንደሊታት ቀርዶ ወእግል ዓፊህ ፈረሐ ወህጅክ ምስለ ልተምነው።

መርየም ምን ክልቀተ ልግበእ ወጠቢዐተ ምነ ዕን ትርእዩ ግርም ወእብ ልብ ፈትዩ ዕሽር ወሃድአት ሰኒ ራውጉት ወሳብረት ሰበት ገብአት ክሉ ለረኣዩ ወትጃለሰዩ ፈትዩ፡ ለሐሽመ ወለሕተርመ። እብ ጆላል ወጀማል ንዩተ ክሉ ለልተምነዩ ፍቲት ወሰይሰት አንሳይት ተ።

አክለ ህተ ከብብ እት ትብል እት መሐጠት ባስ መጽአተ፡ እግል ልርኣዩ ክሉ ክሰመል ሐ ወር ሽንኮተ ለአኖኬ እት ህሉ፡ ህታዲ እብሊታት ሹቅልት ኢተመሰል። አስክለ ኣመቱ ለህሌት ወራት ህዩ ረሐት ደርብ ረሐት ዲብ ካሬ ወተአሳድር የም ዳዩ ወወራተ ትገብእ።

ረቢ ብዲበ መርየም ክሉ እግል ርሐ ምንመ ተምነዩ ህተ ላተ ዲብ ደንጎበ ምን እሊ ክሉ ዲብ መሐጠት ባስ ልግበእ ወዕድ ኣካናት ለለአትቃምተ አብጸሐት እብ ዎሮት ክምሰል ተርፍ ሽክ አለበ። እብሊቱ ለዮም ሱድፈት ዲብ መሐጠት ባስ ለረኣዩ መንደላይ ፈጅር በክቱ እንዴ ኣከ ሳፍር ምነ ላኪን ምን ልቡ ላተ ኢትብዴ። ንዩት ህዩ ዕልብ ሐጸት ክምሰል ልትበህለ ክሉ ዲብ ልተምነዩ ወልትነዩተ እብ ትምኔቱ ወንዩቱ ሌጠ ተርፍ ምነ።

ምን ክሎም ዘባይን መሐጠት ባስ ላኪን ዝያደት ክሉ ዲብ ልቡ ለአቱት መንደላይ ምን ለህሌ ላተ ራኪ ወድ ዕመር ቱ። መርየም ምን እሎም ክሉም ፈጅር ወምሴ ለልርኡወ ወለልተምነወ መንደሊታት ዲብ ልብ ራኪ ወድ ዕመር አቱት። መርየም ዲብ ልብ

ራኪ እንዴ አቱት ናይ ዲመ መስከበ ልብ ራኪ ገብእ እት ህሉ፡ ህተ ህዩ እት ልብ ራኪ አትዩት ክምሰል ህሌት ዳልዩት ተ ገብእ? ኮንዶእ!

ራኪ እግለ ክምሰል ሰዐር ርምዴት ዲብ መዓቅቅ ልቡ እሙድት ለዐለት መርየም እግል ልርከብ ትምኔት ላሊሁ ወአምዕሉ ገብኦ። ልቡ ህዩ ደለ መርየም ጌሰት እቡ እትጀህ ትሰለበ። ዕንታትቱመ ደርብ አውሀሉ። ራኪ ብዕድ ሴር ቡ መ ሴሩ መርየም ሌጣተ ረቢ ደሌ። ላኪን ለናይ ሰልፍ ወደንጎበ ሪሸት ልቡ ለተምተመት ላተ ህታተ።

ራኪ እብ ግርመተ ወጀላል መርየም ልትዐጀብ ዐለ ዲኢኮን ህቱመ ማሽኦለ ወትባረከለ ሐቱ



ናቅሰት ምነ አለበ። እብ አደቡ ወግርመቱ፡ ክሉ ወድ ተብዐት ለልትወሰፍ እቡ አውሳፍ ግርመት ወጀላል ህዩ እተ ባኑት እበይኑ ለበሐተዩ መስል። ዝያደት ክሉ ህዩ አደብ ወተዕሊም ምነ ረቢ ለካፈለዩተ ወህበት ዐለ።

ላኪን ሐቱ ዴብ ለዐለት እሉ ምስል እሊ ክሉ አደቡ፡ ሐጠሩ፡ ተዕሊሙ እት ቀደም መርየም እተ ቦጥር እቱ ወክድ ላተ ዝለት ትትከሬ እቱ ከእለ ልብል ወበልሰ ቀዌ። ክምሰል ካይን ዲብ ምድር ለአድኖኔ። ላኪን ክልዶል ሰርቅ እንዴ አበለ እቅምት ለአብለ እት ህለ ዝያደት ሪሸት ልቡ ትቅቅስ።

ራኪ እብ ልቡ ፈተዩ ዲኢኮን እብ አፋሁ እግል ልንቀመ ኢደቅበ። ግሩም እት እንቱ እብ ግርመተ ልትዐጀብ። ዕሽር ዲብ እንቱመ ለዕሽረተ ክምሰል ማላእክት ሰበት ትትረኣዩ ዝያደት ክሉ ለወሰፈ ላሊ እት ሰካቡ ወአደሓመ እት መዓላቱ ልትረኣዩ። ለሐሰብ ወለአስተንትን። እት ሚ ክምሰል ወሰፈ ህዩ ልትቀወዌ እቱ። እብ ክሉህ ዝያደት ነፍሱ ሰበት ለሐሰበ ህዩ አርወሐቱ እት ቀደመ ክምሰል በዐል ኢሴመ ለዐልበ። እብ ክሱስ ሻማቱ ወዴራሩ እግል ለሓኬ እግለ ህዩ ሒለት ወደቅብ ለሐግል።

ሻም መርየም አሰልፍ ክምሰል ብልሕት ኮናት ዲብ ልብ ራኪ ምንመ ትሰቀቅ ህታመ ሐቆ መደት እንዴ ኢልትአመረ ህታመ ልበ እበ ግሩም ወሕሩይ ምን ሰናቱ ራኪ እግል ልሰለብ ወቅት ኢከሰኦ ምነ። ክልዶል ህቱ እበይኑ ቅብላተ እብ ሻማተ ልትሐለም ወልትቀሌ ለህለ መስሉ ዐለ ዲኢኮን ህታመ ልበ ምን ልትቀለሰ ላተ እግል ራኪ ዲብ ልበ

አካን ዐባይ ሃይባቱ ዐለት። ክልዶል ሰርቅ እንዴ አበለት ትትሐውረሩ ዲብ ህሌት ልትፈሌ እሊ ጀነ እሊ ናዩ ገብእ ትብል ዐለት። ሻም ህዩ አመተ ኢተአመረት እብ በርናምጅ እንዴ ኢገብእ እብ ኖሱ እተ ሐዝዩ ወቅት ወአካን ጠበሽ ለልብል አመቱ ኢተአመረት ቱ።

ሻም ክምሰል ልትበህል እንዴ ፈቱክ ለትረክቡ ወእንዴ አቤክ ለትረይሙ እንዴ ኢገብእ፡ ኖሱ ክምሰል በርቅ ተልወሕ ለልብል እትከ ናይ ወድ አዳም ሽዑር ቱ።

መርየምም እብሊ ናይ ሻማት ሽዑር ሐቆለ አግረሰት ኢሰክበት ወኢቀሰነት። ህተ ወራኪ ህዩ ሕድ እንዴ ኢደሉ እብ ጀህት ጀህቶም እብ ሻማት ሕድ ትቀለው ወትካማጀነው። ላኪን እት አልባብ ሕድ እንዴ አተው ከፎ ሕድ ልድለው? ህቱ እብ ጀህቱ እብ ሻማተ ልትቀሌ ወህታመ እብ ጀህተ እብ ሻማቱ ትነድድ።

መርየም ለአካን አሰልፍ ሻማት ራኪ ጸብጠዩ ዲበ መሐጠት ባስ አክለ ትዘክረት ህዩ ክምሰል ከዕበት ዲመ አሰከ ተአውሀሌ። እተ መሐጠተ ባስ ክምሰል በጽሐት ህዩ ለሰዩሱ ዕሽር ወበዐል ጆላል ራኪ ልትዋሰፍ እግለ። አክለ እግል ሽቅል ጌሰት ወአቅበለት ህዩ ለአካን ክልሕ ዲብ ትብለ ተአቀምተ። ዲመ ራኪ ዲበ ለነብር ሰበት መስለ ህዩ ቀበትለ ሽባን ለህለው ተአትቃምት። ላኪን ራኪዲ እብ ሻማት ርሐ ልትቀሌ ዐለ ዲኢኮን ለደርቡ ቅሩን ዐለ ሻማት መርየም ዳልሁ ይዐለ።

ሰብ ሻማት ዲመ እብ ተዕበት ወሸቀላት ምንመ ልሽዕሮ አትዋደን ሻማቶም ዝያደት ክሉ ራሐት ሰበት ለሀይደም ዐሣብ ፍቱ ወሸቀላት በዐል ሻም መስሉ ሐቱ ኢኮን። ክሉ እብ ጀህት ጀህቱ ህዩ መጅብ ራሐት ደሚር ልትረኣዩ።

መርየም ላተ አክለ አምዕል ሐቱ አሰበሐት ወአምሴት ክልኢ እግር ራኪ አስክ መሐጠት ባስ ሽንብርኬተን እንዴ ዋጪለዩ እት ለአውሀልዩ ልትረኣዩ ዐለ። ራኪመ እተ ክምሰልህ። ህቱ ወህተ ለሀይ ከሻም ለሀይ እንዴ ኢደሌ አልባዎም እብ ሻማት ሕድ ትመዩሰ። ራኪ ክምሰል መርየም ህቱመ እት ገበዩ ሀምገም እት ልብል መርየም እግል ልርኢ አስክ መሐጠት ባስ ሰድ ገይሰ እበ ሌጠ ለአትዋይን፡ ለሐሰብ ወለሀምም። እት ገበዩ ብዙሕ ሀም ገም እት ወዴ እግለ ርዩም መሳፋት እብ ሽፋግ እት ልውሕዩቱ ዲብ መሐጠት ባስ ክማም ለገብእ።

ራኪ ልቡ ሻማት መርየም እት ለአትዋይን “ደረቢ ሐሰብክ ኣነ እለ መርየመ እትለ መሐጠት አጽነሐኒተ። ደረቢ እት ሕድ ጅምዐነ። እንዴ አትረኢከነ ህዩ እበ ግሩማት አንዩባታ ተበሰም እት ትወዴ እበ ማይማዮ እዲያተ ሰላም ወቱሰኒ ጀነት እዲነ ወረኢኮ” እት ልብል እምበል ፈዋን ወሌለ አስክ መሐጠት ባስ ሌጠ ሰዐ ወአሳደረ። ራኪ ዲበ መሐጠት እት

ልሽእግ አክለ መጽኦ ሀንደገት ልቡ ዝያደት ዘብጠት። መርየምም እተ ክመልህ፡ ኢደሌቱ ዲኢኮን ህታመ እብ ሻማት ራኪ እት ትትቀሌ ክመ ናዩ አትዋየነት። መሐጠት ባስ ህዩ መሐጠት ባስ ሌጠ እንዴ ኢትገብእ መሐጠት መርየም ወራኪ ገብአት።

መርየም ክምሰል ሐቱ ጋር ሻም ለአለበ አንሳይት እት መስል ክምሰል በዲረ እበ ግሩም መካሪት እገረ ተከብተከብ ዲብ ትብል ዲብል ክምሰል ዲን ሻመ ለትርእዩ መሐጠት ባስ ገጸ አሳደረት። ለወክድ ህተ አስክለ መሐጠት ባስ ዲብ ትሸእግ አክለ ጌሰት ላመ ቀደም እለ ርእያመ ለኢለመእሮ ሽባን ክሎም ሽንኮተ አቅመተው።

መርየም አማናቱ ዕንታት ብዝሓም እግል ትስሐብ ወአልባብ ብዝሓም እግል ትሰለብ። ምን ክሉ ለገርብ ትትለከፍ አለበ። መጋይሰ እገረ፡ ግርመት ወጅህ፡ ጆላል ጭገረ፡ ለራውየት ደመተ፡ ምስለ ሐመልማል ገናበተ ህዩ ክሉ ክም ልተምነዩ ትወዴ። ዝያደት ክሉ ህዩ ለዕሽረተ ወአደበ ለዐበ ጆላል ግርመታ ቱ።

እሎም ክሎም ዎሮ ከአስክ ዳሩ ወዳዩ እግል ልሳፍር ዲብ መሐጠት ባስ ጅዋዕ ለዐለ አዳም፡ ክሉ ሴሩ ተረግ እንዴ አበለ ምስለ ግርመተ ኢትትመሽግ መርየም እግል ልውዐል ወልዳግም ለኢልሸህ ይዐለ። ሰሩመ እግል መርየም እት ለዐፌ ወለአቀምት ምን ሰፈሩ ለተርፋመ ኢልትሐገል።

ወቅት ለመርየመ ዲብ መሐጠት ባስ ጠበሽ ትብለ ህዩ ክሎም ሽባባት እግል መርኢተ ኬን ወእንሰር ልብሎ፡ እብ ፈን መባልሰ ወደኣል ህዩ ዎሮ ከዲቡ እግል ልድለለ ልጸገም። ክሉ እብ ደሚሩ ለተምነዩ ላኪን ለክቡድ ሚዛነ እት ክሉ ከብደ። ምን ልንቀመ፡ ላመ መድእለት ልትበህሎ እብ ዕን ሕውራርም ዲኢኮን እብ ሰኒ ለፈጥነ ኢትረከበ። ላኪን ክሉ እብ ደሚሩ ናዩ እግል ትግበእ ልተምኔ።

ለእት መሐጠት ባስ ልታከው ሙሳፍሪን ህዩ ሕኔት አስክ ባስ ሰፈርም ለአቀምቶ፡ እለ ዲብ ለአፍቀ ልውዕሎ እት ህለው፡ ክል ነፈር ናይ ዲመ ሐማሁ እንዴ ገብአት ከእት ቤቱ እግል ትውለድ ወተዓቤ፡ ሕጻን እንዴ ትበከረት ወለት እግል ተትዐሬ እግሉ፡ ሕኔት መርየም እም ፍላን እት ልብል እብ ሰሚት ወድ ብክሩ እግል ልንቀመ ልተምኔ።

ሰር ገሌመ እብ ሰፋህቱ ለተምነዩ እግል ሃጃክ ወሰሓቃት ሽንህት ወለት ገበይ እበ ልተምነዩ እት ህሉ፡ ህተ ላተ እሊታት ዳልዩቱ ኢትመስል። ለሐቱ ዶል ዲብ ልበ ለአተ ወሪሸት ልበ ለገድኦ ራኪ ልትረኣዩ። እሊቱ ህዩ ለናይ አማን ሻም ሐቱ ዶል ዲብ ልበ ለአተ ራኪ ወድ ዕመርቱ። ላኪን ራኪ እምበለ ህቱ ፈትያተ ህታመ ክምሰል ትፈትዩ ለአምር ገብእ?

ልተላሌ...



ፍሬ ቴራብ ማሌ ኬር ዋሌ

ተዕሊም እት ሐያት ናይ ኦሮሙጅተመዕ ተቅዩር ዐቢ ለአመጽኤ። እት ዐድነ ምን እንረኤ እብ የአምር ሽዑብ ነፍሱ ለደርር ዐዋዲ ክም ሰኒ እንዴ ወደዩ ልታለዩ ነብረ። ክም ተዐለመ ወአመረ ላኪን እግል ለአስርቶ እብ ፈዛዐት ልትጋደሉ ሀለ። ተዕሊም ስለል ጣፍሐት አስክ ዐቦትቱ። ምሮ ገቢል እብ ህግያሁ ወእብ ውላድ ኖሱ ዶል ልትዕለም ሀዩ ለዐቦት ገያደት ትረክብ። እት እንቱ አንሳቱ ዕሉማት ሐቆ ገብአ ኖር ዕልም እግል ኩሉ ለሐዩ። እብ ዐመል ሀዩ ልትረኤ ሀለ። እት እንቱ ዲብለ ረዩም ብሩር።

መዐልመት ጀምሶዩ መሐመድ ዐሊ እት አቅሊም ዐንሰበ ምዴርየት ሀበሮ ዲብ እዳረት ደዋሐ ሀበሮ ጸዕደ እት መአንብታይት ወምግባይት ደረጀት መድረሰት ሽሂድ እስማዒል አዝሀሪ ተአደርሱ። እትለ መድረሰት ጨወኒ፡ አስቃቅ ሐረውያታት፡ ጋንጊ ወልዊት ምነ ልትበሀል ባካት ለመጽኡ አጀኒት ደርሶ። እትሊ አድብር ለበዝሐ እቱ ብሩር ረውዳት ናይ ሸኪክ ሀለዩ፡ ሐድ ኩለን ለልዕልማሆም ወገበይ ፈጅር ለለአጸብጣሆም አንሳት መዓልማት ተን። ዲቡ ክልኤ ሰነት ክም ከልአው ዲብ እት መድረሰት ለሐልፎ። ዲብ መአንብታይት ክም ሐልፈው ለልትከቦቶም መደርሲንመ አንሳት በዘሐ እቶም። ዲቡ ለደርሰዩ እማቶም ወሐዋቶም። መዐልመት ጀምሶዩ እግል ኖሰ አስክ ሳምናይ ፈሰል እት መድረሰት ሽሂድ እስማዒል አዝሀሪት ደርሰት። ሐቆሁ እበዩ ክም ተአብል በሰረ ኢቀዌት። ምንለ ድጌህ ካልእ ድጌ ካዩደት ሌጠ እንዴ ኢገብእ አቅሊም ብዕድ እቱ ጌሰት። ምነ እተ ትረቤት ቤት እመ እንዴ አሬመት ምስል ሞዳይ ብዕድ እግል ትላመድ ዐለት እለ። መዲነት ዐሪታይ እንዴ ኬደት፡ ከረን እንዴ ሐልፈት ከአስመረ እንዴ ተዐዲት ዲብ ቦርዲንግ ደቀምሐሬ ናይ ካልእ ደረጀት ድራሰተ አተላሌት። 11 ፊሰል ዲብ ደቀምሐሬ ክም አትመመት ካልእ ደረጀት ምህርህ እግል ተአትምም ወክድመት ወጠነ እግል ተአንብት አስክ ሳወ ትከሬት። ምን ሳወ ክም አቅበለት እባህ ተሀዲት ወዐየለት ወእብ ተውዚዕመ ዲብለ መድረሰት መዐልመት ገብአት። ህዳይ፡ ዕያል ወሕርስ ምን ሽቅለ የአትረፈዩ ውላድ ተዓቤ፡ ዓይለት ትረፈዕ ወደረሳህ ተዐልም። ዶል ግድዐተ ሰዳይቶም እግለ ኢጠምዑ ምነ መሻቂተ ሀዩ ፈኮም ኢተቀልል። አማናቱ ሀዩ፡ ህቶም ምን ልትጻርረ ወገበይ ምን ከልእወ ጸረ እግል ልቅለል ወኢቀድረ።

ጀምሶዩ እበ እሉ ረክበት ተዕሊም እንዴ አቅነዐት እታህ እግል ትንበር ምራድ አለቤ፡ አዜመ ዲብ ኮሌጅ መዐልሚን እንዴ አቴት ደረጀት ተዕሊመ ወመቅደረት ተድሪሰ

እግል ትወቅል ዐሽም ሀለ እለ። መዐልመት ጀምሶዩ ኦሮ ምነ እሉ ተአደርሰ አናሺድቱ በዲር ህተ ለዐቤት እቡ ወትነሽዶ ለዐለት አዜ መዐልመት ክም ገአት እግል ሐወ ተአጸብጦ ሀሌት። ሐቱ ምኑ እግል ተአስመዐነ ክም ትሰአልናህ ክእነ ዲብ ትብል ነሽደት።



መዐልመት ጀምሶዩ መሐመድ

መርሐብ በሉ መርሐብ መርሐብ እግል ኖሪት ንብረር እለ ንጻፍ አምዕል ቃልየት ክሪት ነአይሸ እት ንተልሄ፡ ሸዩም ቅባል ግሲት 24 ማዮ ጋምለት ደብዐት ደዕሮ ነጽልል እት ሐንቲህ ጠዐመ ነአዳውሮ ታሪክ ለአምጸአዩ ሕበር ንትዘከሮ እምቤዕ ኢኮን ወዕጨይ ዲመ ለእቡ ትፈሪ አድማይ ገቢል ብእተ ታይብ ለኢፈርህ አርወሐት ናይለ ሸዑብ ዲመ እት ለአገርህ ሕበር ንፍረሕ እበ አበው ወለእማት አድማይ ሸባብ ቃሊ ሐው ወለሐዋት እት ጋድሞታት ተርፈው አድብር ወለሳሳት ጀነት ተትባርዶም ሐውነ ለፋርሶታት።

ለገብአ አዳም አንሰ ልግበእ ወተብዐት እግል ተዕሊም እተ እለ ሀለ እግል ሊጊሱ ኢቀድረ ምንገብእ ቀደም እግል ለጃርር ወእግለ ግራሁ ዐቡ አጅያል እግል ልንፈዕ ኢቀድር ለልብል ረአይ ለበ ጀምሶዩ፡ ምን ዐደን ካልእ አካን እግል ኢሊጊሰ ምን መድረሰት ለበዋረ ወቀደም ዕምረን ዲብ ህዳይ ለልትጸመደ ሐዋተ፡ መሓግዝ ሔልፋይ እግል ኢልትሐመለ እብ መስተቅበለን እግል ኢልተልሀየ ትመክር። “እትለ እለ ግሰክ ምን ትገይስ ሀደፍክ ቀደም ኩሉ እግል ቲደዮ ናዊ ሰበት እንተ ሐቲመ ለትካልፈክ ገበይ እግል ተሀሌ ኢትቀድር፡ ምን ትዋጀህከም እግል ተአወልዋ ምነ ለትቀድር እቡ በሰር ኢተሐግል” ሀዩ ትብል። ህተ ምን ሀበሮ ጸዕደ እት ደቀምሐሬ ወምኑመ ዲብ ሳወ ጀለ ተዕሊም ለካዩደቶ ሞዳይ ብዘሕ ተጃርብ ሐያት ክም ረክበት ምኑ ወፊህመ ክም ረዘቀት ተአክድ። አዳም ወጠባይዑ፡

መንበረቱ ወዓዳቱ፡ ሰባተት እት ሀደፍክ ውበዕድ ለትፈናተ አስሉል ሐያት ክም ተዐለመት ሀዩ ሸርሐት እኩ። ዐዳመ እብለ እለ አርአው ንዩት ሕምድቶምተ። እግልሚ፡ ወለቱ ረዩሙ እግል ትጊስ ለለሐዜ ዋልድ ምንመ ኢሀለ፡ ፈጅር ረሐ እግል ትቅደር ወአዳመ ትንፈዕ ገበይ ለፈቲሕ እለ ተዕሊም ክምቱ እንዴ አምነው ወስቀት ታመት እንዴ ወደው ዲበ ምን ሳረሐው፡ ገበይ እግል ትብተክ ወተዕሊመ እግል ተአተላሌ ቀድረት። ጀምሶዩ ምን ሐወ ህታተ ለናይ ካልእ ደረጀት ድራሰተ እንዴ አትመመት መዐልመት እግል ትግበእ ቃድረት ለሀሌት። ሐወ ገሌ ዐሳክር ወገሌመ ሰብ ብትር ብዕድ ቶም። እበ እሉ ረክበት ምን ሐወ ለሐሰ በክት ተዕሊም ፋርሐት ምንማተ እግል ብትሮም ክብር ዐቢ ተሀይቦ። “ድራሰት ሰኔትተ ላኪን ላመ ወጠን ዐቅቢት ተሐዜ ኢኮን” ቴላነ ሰሕቅ እት ትብል።

ፋዋነ መሐመድ ዩሱፍ ዲብ መዲነት ዐሪታይ እት ረውደት ተአደርሱ። እት ሰነት 1998 ናይ



መዐልመት ፋዋነ ዮሰፍ ካልእ ደረጀት መድረሰት እንዴ አትመመት እት አስመረ ምን ኩልየት ዕሉም ተድሪሰ ሸሃደት ሐቆ ነሰአት እት ሸቅል ለትፈረረት። ህተ ዮም እም አርበዕ ጅነ ሀሌት። በዲር ደርሳይት ዲብለ ዐለት እቱ እያም፡ ምን ጥያራት ሐን ዕጨይ ዲብ ትትሓበዕ ወአክራን አስለሕ እዘንክ ዲብ ናቅርቱ ምህር ልትነሰእ ለትብረ። “አጀኒትነ ዮም እት ሰላም፡ ሀሞም ዲብ ድራሰት ወትልሀየ እንዴ ገብአ አብያት ሰኒ እቱ ደርሰ ሰበት ሀለ ፈርግ ወማሌ ዮም ሕድመ ኢኮን፡ ዮም መድረሰት ሌጠ ሚቱ አጀኒት ቀደም መድርሰት ክለ ሰነት እት ረውደት እንዴ ተዐለመ እግል ክትብት ወቅርአት ጃህዝ እት እንቱ አወላይ ለአነብት ሀለ” ትብል ማሌ ወዮም ዲብ ትቃርን። እት መዲነት ዐሪታይ ለሀሌት ረውደት ሐድ 130 ጅነ ተአደርሱ። እብለ ምን ንእሾም ለረከብ መራዐየት አጀኒት ሰኒ ፋሌሕ ለዐቤ ክም ሀለ እት ትሸህድ ሀዩ፡-

“አጀኒት ለዮም ህለው እብ ገበይ መርሐካሆም ምንገብእ ምነ እንተ ሀሌካህ ወለዐል ቶም፡ ለእንተ ተሐሰበ እንዴ ሐልፈው ጸንሐክ” ትቤ።

እሊ ፋዜዕ ዐቅሎም እት ሰኔት እግል ንምርሖ ሰልፍ ለዐቢ ኖሱ ገበይ ሰኔት እግል ልጽበዋ ክምቡ ተአፍህም። ህግያህ ዲብ ተአተላሌ “አዩ እት ቀደሙ ለገብእ ኸጠ እግል ትሰይሐ ወምነ ንእሹ እብ ገበይ ራትዐት እግል ሊጊሰ አሳስ እግል ተአጽብጡ ብከ። ክመ ወረቀት ጸዕደ ሰበት ሀለ እብ ዕልም ወአማን እግል ትምርሐ ሀሌት እከ። ሓጀት እኪት ሐቆ ሀሌት እተ ዶሉ ምን ዝብጠት ነፍሰክ እንዴ ጸበዋክ እኪት ክምተ እግል ተአፍህሙ ወጅብ። ጅነ እግሉ ለኢተትሐዜ አካን ዲበ እንዴ ነሰአካሁ አከይ ለመድ ለልትዐለም እበ ገበይ እግል ትፍተሕ እሉ አለብከ። እግል መሰል ሰጃረት እኪትተ፡ ሰጃረት ኢትቅረብ ትብሉ። ላኪን እት ቤት እት ገጹ ሰጃረት ተአተንን። እንተ ዋልዳይ ዲብ እንተ እት ቀደሙ ክእነ ትወዴ ሐቆ ሀሌክ ህቱ ክም ሰኔት ነሰአ። ጅነ ሰጃረት እኪትተ እት ልብል እግል ልዕቤ ወእግል ልትሐረም ምነ ሐቆ ተሐዜ እት ቀደሙ እግል ተአትንን። ሰጃረት እግል ትልክኩ አለብከ። ለጅነ እግል ሊደየ ለኢተሐዜ ሓጀት እንተ እት ገጹ እግል ቲደየ አለብከ። ለእለ ልርኤቱ ለወዴ። ወእብ ፍንቱይ ለዋልዳዩ አው ለሬፍዓዩ ለወድዩ ክለ ክም ሰኔት ሰበት ለአመሰለ እግል ሊደየ ለሐዜ። እግልሚ መገሰህ ህታተ እት እንዴ ተንከበ ለዐቤ ሀለ። ከለሰኔት ወለገበይ ለራትዐት ለእግል ንኡሽ ትመሬሕ ሕነ ለዐባዩ እግል ነአሰንዩ ሀሌት እነ” እት ትብል ዲብ ዕቢያት ጅነ ዓይላት ወዐባዩ እግል ለአንተብሁ እቱ ለወጅብ ጋራት አትፋቀደት። እብ ሰበት መሃም ረውደት ዋልዲን እግል ለአሙረ ለተሐዘዩ ጋራት ሀዩ፡ ጅነ እት ረውደት እት ልተልሄ እት ልነሸድ ወእት ልትሰአል እጅትማዕየት፡ ፍፍላት፡ ዓላብ፡ ዕሉም ወጀግራፍ ደርሱ። ዋልዲን ወለዘይድ እማት እብ ገፍተር እግል ልዲር ወልትፈረር እግል ልጅመዕ ወልካፍል እግል ልቅረእ ወልክተብ ክም ኢኮን እንዴ አመረየ ኢደርሶ ኢሀለው ለልብል ሕሳብ እግል ኢልጽበጠ ትትፋኔ። ለዲብለ ረውደት ደሩሰ ክም ነዳፊት እዴ፡ ሕጽበት ገጽ፡ ሽነት እት ሸቃቅ፡ ለይአመርካሁ መትሰአል እተ ቤትመ ክምሰልህ እግል ትጽንሐም ሰበት ሀሌት እለ፡ ለዐባዩ መጦር ፈሀምለ አጀኒት ክም ገይሶ ወህግያሆም እንዴ ኢለቀሎ ዲብ ሰአላቶም እብ ተአስትህል ናይ አማን በሊስ እግል ለሀቦ ተሐዜ።

እት መርከዝ ዓፍየት ዐሪታይ ሴድያይት ነርስ ሰተል እድሪስ



ነርስ ሰተል እድሪስ

ህታመ ምነ ሀበሮ ለአፍሬቶም ዕሉማምተ። 11ይ ፊሰል ዲብ ዐሪታይ ሐቆለ አትመመት እት ሳወ ናይ ካልእ ደረጀት ምህርህ ክም አትመመት እት ባርንቱ ክም ሴድያይት ነርስ ሸሃደተ ክም ነሰአት ዲብለ ዐለመተ ዐሪታይ ትወዘዐት ከእግል ዐለመየ ሸዐበ ትከድም ሀሌት። ዓም ነርስ ምንማተ ዝያድ እት አውለዶት ወመራዐየት አጀኒት ትከድም። ምስል ጀማዐተ ክል ፈጅር ቀደም ከሸፍ እግል ሸዐብ ዕልም ዓፍየት ተሀይብ። እሊ ሀዩ እት መራዐየት ዐመሲ ሐራሳት ወአጀኒት ክምሰልሁመ እት ካፍሐት ለለዐዴ ሕማማት ለሀሌት እሉ መንፈዐት እብ ዐመል ክም ትረኤ ተአክድ።

ነርስ ሰተል ከረ ዕምር 15 ክም በጽሐዩ እግል ንሸቄ እንዴ ልብለ ውበዕድ ናይ ንእሸት መካይድ እንዴ አሸከፈዩን ምን ድራሰት እግል ልትፋገረ፡ ኩሉ ምስል ተዕሊምቱ ጥዑም እት ትብል ምን ገበይ ተዕሊም እግል ኢልትሸንከየ ትትሐሰበን። ለእግለ ዶል መርሀዮ ለመሰል እትነ ላኪን አጊድ ለበሌ አሸያኦ እንዴ አጽነሕክናሁ እት ተዕሊም ሐቆ ፈክርክን ጸማክን ኢበዴ። ሐቆ ትመሀርክ እት ነፍሰክ ለብክ ደማነት ትወቀል ወአፍካርክ ፈይሕ፡ ለእሉ ተሐዜ ሀሌክ ሸቅል፡ ህዳይ ውበዕድ በራምጅ ሐቆ እብ ተዕሊም አካን በጽሐክ ልጥዕም ወለሐይስ እት ትብል ሀዩ ረአየ ሀበተን።

ህግዩ ሰተል ክልነ ነአተፍቅ ዲበ እንገብእ። ለእግል ኖሱ እንዴ ኢልትዐለም ለዐለሚክ ሸዐብ ፈኩ እግል ትፍዴ ገአክ ምንገብእ ክምለ ህቱ ለሐዘዩ እንዴ አስበርክ ከእብ ዕልም እንዴ በሸልክ እት ክድመቱ እግል ትረከብ ሀሌት እከ። ዝያድ ሀዩ አንሳይት እግለ ግራህ ትመጽእ ሕታመ መሰል ሰኔት እግል ትግበእ መስኡልየት ሀሌት እተ። ሕተ ሐቱ ሐኪመት፡ ውበዕደት መደርሰት፡ በይጠሪየት . . . ለረኤት ግርዝ ዮም፡ ፈጅር ምነ ቀዳሚት ለሐሰት እግል ትግበእ ረቅበት እግል ቲዴቱ። ለሸዐብ ሀዩ ምን ፍሬ ናይለ እሉ ዘርኦ ቴራብ እግል ልትደረርቱ። ለቀዳምያት መጋዴዕ እንዴ ተሐመለየ ሐቆ ተዐወተየ እት ገቢለን ኬር እግል ልዋልያቱ።



5^ይ ክፈለ

ሐርብ ሰሜናዊ በሕሪ

እለ መፅረሕት እለ እንዴ ኢተአኑቡት፡ ዲብ ርእሲ ዐዲ ወኃዜን አባይ ጃሹ ሰቡት አደቀቡ፡ ህጃም ድቁብ እግል ለሀርስ ክምሰልቱ ጌማም ዐለ። እብሊ ህዬ ጃሽ ሸፅቢ አግቡይ ጸቢጥ ሰዋትሩ እግል ለአደቅብ ወቅወት እግል ልወሰክ ትባደረ። ዲብሊ ጀብህት ሻፍፍ ለዐለ ውሕዳት ክፈል-ጃሽ 96 ተ። ብርጌድ 98 ምን ግራት-አውልፅ አሰክ ሐርመት አልጌን፡ ብርጌድ 91 ምን ሐርመት አልጌን አሰክ ጽርግዩ ፍልፍል-ክዶ፡ ብርጌድ 49 ምን ጽርግዩ ፍልፍል አሰክ ዲላዐር ዳብጣት ዐለዩ። እግል ሰዳይት ለትረተብት ሐቲ ቦጦሎኒ ክቡድ ስለሕ ህዬ ምስለን ዳብጣት ዐለት። ለአካፍት ፋዬሕ ሰቡት ዐለ ፈሳይል ስለለ ቀደም እንዴ ሐልፊያ ለራቅባሁ ባኩት ዐለ። ብርጌድ 98 ዲብ ግራት-አውልፅ እግል መደት ረዶም ፅሰክርት ሰቡት ዐለት፡ ሰዋትረ ሻቅዩት ዐለት። ምን ርእሲ-እምበደርህ እንክር ድማን ላኪን ፋዬሕ ሰቡት ገብኤ፡ ለትፈናተ ውሕዳት ለትባደለዩ እቲ ደዋዬሕ ሰቡት ዐለ ድማን ለሊህይብ ድፈፅ ይዐለ እቲ።

ናይ አባይ ክፈለ-ጦር 22፡ ዲብ የም 19 ኣፕሪል ሳቡት 4፡00 ጽብሕ ምድር፡ እብ ድቁብ ቀዝፍ መዳፊፅ እንዴ ተለ ዲብ ሰዋትር ጃሽ ሸፅቢ ህጃም ጠለቀ። እብ ፍንቱይ ህዬ ዲብ አፍ-ገረብ ለልትብህል ድፈፅ ሸፍ ድቁብ ገብኤ። እብ ጀህት ሳቡር ሰዋትር ትሩድ ሰቡት ኢዐለ፡ አባይ እግል አወላይ ከዋ መዳፊፅት እግል ልጽብዋ ይሐለዩ። ዲብ ብፅድ ድዋራትመ ሕድ ለሸብህ ህጃማት ሀረሰ። ጃሽ ሸፅቢ ላኪን እንዴ ሰምዶ ዳፊዐ። ሐቀ እለ ለእብ ጀህት ሳቡር-ሰጊ አባይ ዳብጣት ለዐለ አካፍት እብ ህጃም ምዳድ ክምሰል ለአቀብል ገብኤ። እትለ ሳቡት እለ ጃሽ አባይ እብ ጀህት ርእሲ-እምበደርህ ጃሽ እንዴ ሐየብ ድፈፅ ጃሽ ሸፅቢ እንዴ በክእ ርእሲ-እምበደርህ ጽብጠ።

ዲብ የም 20 ኣፕሪል ዲብሊ ተአተጽቤሕ ላሊ፡ ክፍለ-ጦር 23፡ ሐሊቱ እንዴ ከምኸመ ዲብ ግራት-አውልፅ ወአፍ-ገረብ እት ልጃገር ትመዩ። ሳቡት 3፡00 ላሊ ህዬ እግል ሰዋትር አፍ-ገረብ እንዴ አፍረሰ እንክር ድማን እንዴ አፍዩሐ ወቅዋት ዲብ ለአዘይድ እብ ትሉሉይ ልትሻፈፍ ዐለ። ዲብ የም 21 ኣፕሪል ለተአተጽቤሕ ላሊ ራድኢት ለመጽአዩ አርበኛ ሰርዩት ናይ ክፈል-ጃሽ 52፡ ምስል ውሕዳት ክፈል-ጃሽ 96 እንዴ ትወሰክዩ ህጃም እግል ለሀርስ ዲብ መዳሊት እት እንተን፡ ክፍለ-ጦር 22 እንዴ በድረ ሳቡት 4፡00 ጽብሕ ምድር ህጃም ጠለቀ። ውሕዳት ጃሽ ሸፅቢ ህዬ፡ እግል ሳደፈ ህጃም አባይ ሐቀለ ትባጠረዩ፡ ህጃም ምዳድ እንዴ ሀረሰዩ ሳቡት 12 ፋዳሰ እግል ግራት-አውልፅ ጽብጠዩ። ዲብ የም 22 ኣፕሪል ክፍለ-ጦር 22፡ ሸቡህ ህጃም ምንመ ወደ፡ እንዴ ትጸፈዐ ግረ አቅበለ። ምናተ ፈጅራተ የም 23 ኣፕሪል ዲብሊ ሐርብ ለደዐፊየ

ለናይ ደንጎብ ሐርብ ተሕሪር

ውሕዳት እንዴ በደሊ፡ እብ ድቁብ ቀዝፍ እንዴ ተለ፡ ለዲብ የም 21 ዳብጣት ለዐለ ድዋራት ምን ሐዲስ እግል ልብለሰ ህጃም ድቁብ እንዴ ጠለቀ እብ ድግማን እግል ልጽብጡ ቀድረ። ክፈል-ጃሽ 96፡ ለሸክተ ውሕዳት ምን ሐዲስ እንዴ ዝመ ክልኤ ሰርዩት ናይ ክፈል-ጃሽ 16 እንዴ ወሰክ፡ ዲብ የም 24 ኣፕሪል ሳቡት 18፡00 አምሱይ ህጃም ሀረሰ። ሳቡት 23፡00 ህዬ ናይ መዳፊፅት ከዋ ግራት-አውልፅ እብ ተማሙ ጽብጠዩ።

ግረ እለ እግል ርእሲ-እምበደርህ ወድዋረተ ምን መራቀቡት አባይ



እግል ልንዘፅ ክፈል-ጃሽ 52 ህጃም ምዳድ ወደ። ዶል ዲብ ለአሸክት ወዶልመ ዲብ ሸክት ሐቀለ ትጃገረ ህዬ፡ የም 25 ኣፕሪል ምን ክፈል ጃሽ 16 ምር ቦጦሎኒ ምን ክፈል-ጃሽ 96 ክልኤ ቦጦሎኒ ትወሰክዩ እቲ። እለን ውሕዳት እለን፡ እብ ቀዝፍ መዳፊፅ ወምርታራት ለተለ ህጃም ምዳድ እግል ሊደዩ ዲብ ልዳለዩ፡ ዲብ ጀብህት ምንደፅ ገብኤ ለዐለ ህጃማት አባይ እብ ተማሙ ሰቡት ፈሸሰ። ክፈለ-ጦር 21 ዲብ መገባሉ እግል ለአቅብል ተአዘዘ ከዩም 27 ኣፕሪል 1990 ዲብ ለዐለ ጃሽ አባይ ዲብ መገባሊሁ አንሰሐቡ።

ንዘም ደርግ እብሊ እግል መደት ስለሰ ወሬሕ ለወደዩ ትሉሉይ ህጃማት ወሬራሮታት ምንመ ኢተዐወተ፡ “መቅደረት ጀብህት ሸፅብዩት ህጉጊት ትገብኡ” ምን ልብል ጌማም፡ እምበል ሐሊት እንዴ ወሰክክ ትሉሉይ ፊራሮታት አትበጋስ ወሐርብ አተላላይ ብፅድ ልትረአዩ ይዐለ። አኪድ ህዬ ከዋ አሰመረ-ባጽፅ ምን ከሲት ብፅድ ምን ፈሸል ለለድሕን ዐሰከርያይ ሕርያናት ይዐለ እለ።

ንዘም ደርግ ዲብ ክእን ላቲ ዱዩግ ቴሌል ዐቅል ወእት ናይ ቡቲክ ሰእዩት ትርኢኒ እት እንቲ፡ ጀብህት ሸፅብዩት፡ አባይ ዐሰር ኢነት ጃሹ ወጽዋሩ ዲብ ወሰክ ለወደዩ ፊራሮታት እግል መትባጣር እዳሁ እንዴ ረበዐ እግል ልታኬ ሕርያት ይዐለ። እግል መብቅያይ ስታት አባይ እግል ልዋጅህ ብፅድ ብሰር እግል ልትገፈፅ ህዬ ዐለ እለ።

አባይ ሐቀህ ተሀደገ ፋሽል ጀርቤታቲ፡ “ዘመቸ አለለ” ለአተምበለዩ ብፅድ ሐዲስ ፊራሮ እግል ለአትባግሰ ስታቲብ እፍጉር ዐለ። ብሰር ናይ እለ ፊራሮ እለ ምን ቀደሙ ለዐለ አብሰር ብዙሕ ለልትፈንቲ ክምሰል ኢትን ልትአመር። አባይ እግል እለ ፊራሮ

እለ ዲብ ልዳሊ ላኪን፡ ጃሽ ሸፅቢ ዲብ ግብለት ኤረትርዩ ህጃም እንዴ ሀረሰ መዳይን እግል ልጽብጥ ሰቡት አምቡተ፡ ለሰታት እንዴ ኢልትብገሰ አቀለዐ።

ዲብ እለ እብ ዐመልዩት ፈንቅል ለትረከብ ነሰር እግል ሕፍዘት፡ እግል መደት ስለሰ ወሬሕ ዲብ ጀብህት ምንደፅ ለገብኤ መሪር ወደመዊ ጅግረ ሐድ 3000 ምናድሊን ክምሰል አስተሸህደው ተቃረር ለሐብር። ዲብሊ ምን የም 8 አሰክ 29 ፊብራይር 1990 እግል መደት 20 አምዳላት እግል ተሕሪር ባጽፅ ወራድኢት አባይ ዲብ ደንጎሎ ወሰሚናዊ ባሕሪ

እግል ሕንቀት ለገብኤ ክምሰል ክፋል ዐመልዩት ፈንቅል ለልትነሰኢ ህጃማት ለአስተሸህደው ምናድሊን 1100 ክምሰል ዐለው እት ወግም ዶል ለአቲ፡ ለዲብ መጃገረት ጀብህት ምንደፅ ለደፈዐ ዐውል አክልኢይ ክቡድ ክምሰል ዐለ ፍሂም ኢለአግም። ጃሽ ሸፅቢ እግል እለ ድቁብ ቀዝፍ ናይሊ ትፈናተ ስለሕ ወዋያራት ሐርብ ለተለ ፊራሮታት፡ ዐውል ቃሊ ዲብ ደፈፅ እብ ክለ ሐሊቱ ሰቡት ትባጠረዩ፡ አባይ ዲብ እለ ፊራሮታት እለ ለገብኤ ናይ አካን ተቅዩር እግል ለአምጽኢ ኢቀድረ። ሐድ 30.000 ናይ አዳም ከሳር ክምሰል ሳደፈቲ ህዬ ወሳይቁ ለአክድ።

መትአሳስ ጀብህት ግብለት

ግረ ዐመልዩት ፈንቅል፡ ንዘም ደርግ ጀብህት ምንደፅ እግል ሰቢር ለወደዩ ፊራሮታት ዐባዩ፡ እግል ጀብህት ሸፅብዩት ዐውል ቃሊ ጠልቦ ም። ሰቡት እለ፡ ቅያደት ጀብህት ሸፅብዩት፡ ዲብ በርናምጅ አባይ እንዴ አቲት፡ ዲብ ትሉሉይ ናይ መጃገረት ሐርብ ሐሊተ ሕፎት ሸልት፡ እብ ጀህት ግብለት ኤረትርዩ ብፅድት ጀብህት ሸፍ እግል ትክሰት ቀረረት።

ሀደፍ ናይ እለ ስታት እለ፡ ዲብ ግብለት ህጃም እንዴ ሀረሰኩ፡ ዲብ ጀብህት ምንደፅ ለዐለ ጨቅዋ አባይ አንቀሶት፡ አባይ ሐሊቱ ክምሰል ትትካፈል ወባጽፅ እግል ልብለሰ ለዐለ እለ ሕልም ክምሰል ረምሽ ዊደት፡ ዲብ ግብለት ኤረትርዩ ለዐለው ሚሊሽ ወወደገቡ ክምሰልሁመ ሸዕብ ግብለት እብ ዓመት፡ ሸባን ህዬ እብ ፍንቱይ ድድ አባይ እንዴ ቀንጸው ሰውረቱም ለለአደቀቦ እብ ሓላት ከሊቅ፡ እብ ጀህት ግብለት ወግብለት ምናጋር ጸሓይ አሰክ አሰመረ ሸኢዔ፡ እግል መከረዩ ዋያራት አሰመረ ዲብ ዝያደት ፍገራት ለትትረከብ ምኑ መሳፊት ዘብዩ ክቡድ ስለሕ እንዴ አቲክ ሸለሎት፡ ዲብ ደንገበ

ህዬ፡ ለዲብ ኤረትርዩ ለዐለ ካልኢይት አብዮታይ ጃሽ ዲብ ከርዶን ሻምል እንዴ አቲክ ካረጅት ቱ ለዐለ።

ዲብሊ መደት ለህ ጃሽ ሸፅቢ ተሕሪር ኤረትርዩ፡ ምን ጀብህት ምንደፅ አሰክ ጀብህት ከረን ምጡጥ ዐለ። ጀብህት ከረን ምን ሐልሐል እንዴ አንበተ አሰክ ሮራ-መንሰፅ ልትመደድ። ምኑ ህዬ እብ ምራረ እንዴ አብሊ ምስል ድማናይ ደንበር ጀብህት ምንደፅ ለለአሰር ዐለ። ለደቀቡት ሐሊት አባይ ወጃሽ ሸፅቢ ሻፍፍ እቲ ለዐለ ምግባይ ጀብህት ምንደፅ ህዬ እንክር ድግለብ ከብ እንዴ ሐልፈ አሰክ ባኩት ዐዲሮሶ በጽሕ ዐለ። ሰቡት እለ፡ እብ ጀህት ግብለት ሐርብ ከሲት፡ እግል እለ ዳይ እለ ለሰርግለ ውሕዳት ምን እለ ፋይሕ መትመዳድ ለዐለ እለ ጀብህት እንዴ ትፋገረዩ አሰክለ ጀብህት ሐዳሰ መርበይ ህጃም እግል ልትዐደዩ ዐለ እለን። ዲብ ወሬሕ ኣፕሪል 1990 ህዬ፡ ገሌ ለተሐደደ ውሕዳት ጃሽ ሸፅቢ፡ አሰክ ግብለት ኤረትርዩ ክምሰል ልትሐረክ ገብኤ።

ቀደም እለ፡ እብ ጀሃዝ ጀማሂር ወሰለለ ጀብህት ሸፅብዩት፡ ዲብ ባኩት ሰንዐፊ ወዐዲቀይሕ ምስል አባይ ፅንዱቃም ለዐለው ውላድ ዐድ ሚሊሽ ወወደገበ እግል ዝዞት ለገብኤ ወቀይ ዐለ። እብሊ ገብኤት መፋህመት፡ ለመጦር አባይ ፅንዱቃም ለዐለው ሚሊሽ ወወደገበ ጃሽ ሸፅቢ ዲብሊ ለህጅም እቲ ወክድ፡ በሊስ እንዴ ኢሊህይዮ አባይ እግል ኢልሰደው ዲብ ውፋቅ ብጽሕ ዐለ። እብሊ አሳሰ እለ ህዬ ለድዋራት እግል ሃጅሞት ለለቀድር ስታት ፈግረ። ዲብሊ ህጃም ለሻርክ ውሕዳትመ ዳለዩ።

እትሊ ህጃም እለ ለትዩመመዩ ውሕዳት ጃሽ ሸፅቢ፡ ብርጌድ 20 ናይ ክፈል ጃሽ 70፡ ምስል ሐቲ ሰርዩት አግር ክቡድ ስለሕ 46 - 70፡ እብ ተውሳክ ውሕዳት ኮማንዶ (07) ሐቲ ቦጦሎኒ ወክልኤ ሰርዩት ዐለዩ። ብርጌድ 20 ምን ሻፊት እቲ ለዐለት ድገለባይት ጀብህት ምንደፅ - ባኩት ከብ - እብ እግር ዲብ ሐንቲ አባይ ለዐለ አካፍት እብ ምስጢር እንዴ ሐልፈት፡ ጽርግዩ ማይ ሰራው እንዴ ተዐርሬት፡ ጸርን አቲት። ምኑ እብ ዐዲግራት እንዴ ጠዌት ምስል ዲብ ሓልፋት ለዐለዩ ውሕዳት መከናይዝድ አሰክ ዘለምበሰ ሸኣገት።


ምን መከናይዝድ ክፈል-ጃሽ 74፡ አሰክ ግብለት ለትባገሰዩ ገሌ ክፋል ናይ ብርጌድ 73 እትገብኤ፡ ምን ጀብህት ከረን ወግንደፅ ለመጽኢያተን። እለ ውሕዳት እለ ስለሕ እንዴ ጽብጠት አሰክ ዘለመበሰ እግል ቲጊሉ እግል ሀመገም ናይሊ ሐርብ ለፊዴሕ እት ረኣሰ ግብሊቲ እግል ልሄረ እብ

ለቀድረ ውጤት ገበይ ኢዐለት። እብሊ ህዬ፡ ደባቡት ምን ወያኔ እግል ትትዐንደቅ ትሰተተ። እብሊ አሳሰ እለ ለምን ጀብህት ሐልሐል ዲብ የም 13 ኣፕሪል ለትባገሰት ውሕዳት መከናይዝድ፡ እብ በርክ እንዴ ሐልፈት፡ እብ ሸላሎ እንዴ ጠዌት ትግራይ ሐቀለ አቲት ምስል ብፅዳት ውሕዳት ጃሽ ሸፅቢ ተሓበረት። እለ ውሕዳት እለ፡ ምን ወያኔ ለነሰአቲ ወናሰ ለጽብጠቲ ስለሕ ስለሰ ደባቡት፡ ሰሰ ናይ 122 ሚሊሚተር መዳፊፅ፡ ምር ቢኤም21፡ አርበኛ ዙ-23 ረሻሻ ምዳድ ዋያራት፡ ምር ድድ ደባብ ሚሳይል፡ ምር ምዳድ ዋያራት ሚሳይል ፅንድቅት ዐለት። ምስል አግር ጃሽ እንዴ ተዓወነት ህዬ እግል ተሕሪር ሰንዐፊ ዳይት። ሐርብ ዲብ ድዋራት ድግስ ክምሰል በጽሐ ዲብ ማይ-ሰራው ከቢን እንዴ ወደ ለሀርስ ጃሽ አባይ ለከፊሱ ብርጌድ 35 ናይ ክፈል ጃሽ 88መ ዲብ ዐክል ሐረት ካብን ዐለ።

ኤታን ናይሊ ህጃም፡ ቦጦሎኒ 2-20 ናይ ክፈል ጃሽ 70፡ ምን ጽርግዩ እንክር ምፍጋር ጸሓይ ለህለ ደገቢት እንዴ ጽብጠዩ ዲብሊ ባኩት ለዐለ ሚሊሽ ሸንራይ ኤረትርዩ አሰክ ዐዶታቶም ክምሰል ልትፈንጠሮ እንዴ ወዳክ አሰክ ሰንዐፊ እግል ትሄርር። ቦጦሎኒ 3-20 ምስል ክልኤ ሰርዩት ቦጦሎኒ 1-20 እብ ገበይ እምብ-መሰሐል እንዴ ሃጀመት፡ ጽርግዩ እንዴ ጽብጠት አሰክ ሰንዐፊ እግል ተአተላሊ፡ ሐቲ ቦጦሎኒ 2 ወሰርዩት ኮማንዶ ምስል ሐቲ ሰርዩት ቦጦሎኒ 1-20 ምን እምብ-መሰሐል ለሀርብ ጃሽ አባይ እግል ፈንጠሮት ዲብ ሀምነት እንዴ ኮብዩ እግል ልጽጎሐ፡ ደባቡት ወመዳፊፅ ህዬ ምስል አግር ቅዋት እንዴ ትመቅረሐ ለተሀደብዩ አህዳፍ እግል ለአድሚፅ ዐለ።

ጃሽ ሸፅቢ ዲብ የም 24 ኣፕሪል 1990 ሳቡት 2፡00 ላሊ፡ እብ ጀህት ዘለምበሰ ሰክር ለዐለ ምር ሽምባል ጃሽ እንዴ ከርዶን ህጃም አምቡተ። ሳቡት 6፡25 ህዬ ለጃሽ እብ ተማሙ ደውሸሸ። ምን ፎርቶ-ኳዴርና እግል ራድኢት ለትለክክ ምር ሸለቀ ናይ ትግራይ ሚሊሽ ሸንራይመ ዲብ ገበይ ምስል ጸንሐይሁ ውሕዳት ጃሽ ሸፅቢ እት ሸፍ እንዴ አተ እንዴ ትጸፈዐ ትፈንጠረ። ህጃም አተላሊ። ጃሽ ሸፅቢ ባኩት ሰር አምዕል እግል ፎርቶ-ኳዴርና፡ ሳቡት 15፡30 ህዬ እግል ሰንዐፊ ሐረረ። እብሊ ናይ ሀምነም ህጃም እለ ለበሀረረ አባይ፡ መትቀዳም ጃሽ ሸፅቢ እግል ልትካል ሚሊሽ ሸንራይ ሰራዬ ወንዝም ጃሽ አሰክ ዐዲቀይሕ አትባገሰ። እምበል እለ ምር ብርጌድ ምን ዓለ አሰክ ሰንዐቲ፡ ምር ፍንቱይ ኮማንዶ ብርጌድ ህዬ ምን ምንደፅ አሰክ ደቀምሐሬ አተ።





ርክን ተእሪክ

ካልኣይ ሐርብ እዲነ ክምሰል ኣክተመ ናይ ገለድ ድወል መሲር ናይለ ዲብ ሐንቲ ጥልያን ለዐለዩ ድወል በህለት እርትርዮ፡ ሶማል ወሊብዩ እግል ልቀርረ ገመዩ። ዲብ ወሬሕ ሰማን ናይ ሰነት 1945 ሙእተመር ሰላም እንዴ አሰሰዩ ቴለል ናይለ ድወል እግል ልሕፊዘ እንበተዩ። እብ ኣሳሰለ ሙእተመር ለሳደቀዩን 23 ማደት ለድወል ዲብ ፓሪስ ወዕለ እንዴ ወደዩ ሶማል ወሊብዩ ሕርየተን እግል ልንሰኣ ቀርረ እት ህለዩ፡ ቀድዩት እርትርዮ እብ ዋይዲባት ሰብ ኣከይድሰ ተህንጦጥል ተርፈት።

ሰበት እሊ፡ ምራድ ገቢል እርትርዮ ለተሐፍዝ ልጅነት ኣሰክ እርትርዮ ነድኣው። ለለጅነት ዲብ ኣሰመረ እንዴ መጽኣው እግል 3336 ኣንፋር ሌጠ እንዴ ትሰኣለት ሰበት ኣቅበለት ሽቅለ ኩብቲ ኢረክበ። ቀድዩት እርትርዮ ህዩ ዲብ መጅልስ ቅራንሐልፈት። ምጅልስ ቅራን ምራድ ገቢል እርትርዮ ለትበይን ድራሰት እግል ትግበእ ለመሰኡልየት እግል ሕኩማት ፓክሰታን፡ ግብለት ኣፍሪቀ፡ ንቲማሎ፡ ኖርወይ ወበርመ ሀበዩ።

እትሊ ወቅት እሊ ኣቶብዩ፡ እርትርዮ ወኣቶብዩ እም ወወለታ ተን እት ትብለ እብ ተሐት ተሐት፡ ምሰል ኣሚሪክ ዋይዲባት ትወዴ ዐለት። መሰኡልየት ለነሰኣዩ ድወል፡

- ኖርወይ፡ በርመ ወግብለት ኣፍሪቀ ሐድ ምን ገቢል እርትርዮ ሕርየት ምንመ ጠልበ ለደውለት ገቢለ እግል ተኣንብር እቡ ለትቀድር ርዝቅ ኣለበ ቤለዩ።

- ፓክሰታን ወንቲማለ ገቢል እርትርዮ ምራዱ ሕርየት ሰበት ተ፡ እርትርዮ ሕርየተ ትንሰእ ለሐብል ረኣይ ቀደመዩ።

እብ ክእነ ህዩ ለጋር ዲብ መከሐደ ኣተ። እትሊ ወቅት እሊ ኣሚሪክ፡ “እርትርዮ እምበል ኣቶብዩ ወኣቶብዩ እምበል እርትርዮ እግል ልንበረ ሰበት ኢልጥዕም መታሊት ተን እት ልብል እግል ኣቶብዩ ኣዩደ።

- ልኡክ ብሪጣንዩ እርትርዮ ዲብ ክልኤ ትትከፈል ለልብል ረኣይ ኣቅረበ።

- ልኡክ ጥልያን፡ ቤልጁም ወብራዚል፡ እርትርዮ ሕርየተ ምን ትንሰእ ለሐይስ ቤለው።

- ልኡክ ፓክሰታን ሳሌሕ

ቢዩቢያድዲን፡ “ክምሰል እርትርዮ ለመሰለ ድወል ሕርየተን ሐቆ ደሀብን እብ ክሱስ ሕርየት እግል ንህደግ ኣለብኩ።” እት ልብል ትከሐደ።

- ልኡክ እትሓድ ሶጼት እርትርዮ ሕርየተ ትንሰእ እት ልብል ወኣሰባብ ዲብ ሸፊሕ ወቅቱ ሰበት ተመ እት ምግብ ኣትካረመዉ። ህቱ ላተ ሓርቅ እት እንቱ ህግደሀ ኣተላለ። ምናተ፡ ቃኑን ኢሰሚሕ እግልክ እንዴ ትበህለ ኣብጠረዉ።

እብ ክእነ ህዩ ቀድዩት እርትርዮ እንዴ ኢትትቀረር በጥረት።

ሐቆ እሊ ገድም፡ ቀድዩት እርትርዮ እብ ድግማን ዲብ መጅልስ ቅራን እንዴ ቀርበት ንቃሽ ሐቆለ ገብኡ፡ ምን እተ ወቅት ለህይ ለዐለዩ 60 ድወል ኣሚሪክ ለትመርሐን 45 ደውለት እርትርዮ እብ ፈደሬሽን ምሰል ኣቶብዩ እግል ትትቀረን ለኣይደ እት ህለዩ፡ 10 ደውለት ሕርየት ኣዩደዩ። ኣርበዕ ህዩ ሶት (ክርን) ደሀበዩ። እብ ዋይዲባት ኣሚሪክ ወኣቶብዩ ህዩ ገቢል እርትርዮ ሕርየቱ እንዴ ትከልኣ ኣሰክ ንዓል ሄረረ።

ምን ክታብ “ኩብ ጉዕዞታት ታሪኽ ኤርትራ” ለረከብናህ።

ሙክነ ንፋሰስ

- ሐቱ ናይ ኸጠጥ ማሌኸዩ ላተ ጥያረት ዲብ ፍንጌ እት ፍንጌ ጃፓን ወጀይነ ምንዲ ትወድቅ እብ ሐያቶም ለተርፈው ኣንፋር ዲብ ኣዩ ልትቀበር። በህለት እት ቸይነ፡ ማሌኸዩ፡ ሚ ጃፓን?

- ሐቱ ቆርዕ ዲብ ረኣስ ቅራር ሞተት። እለ ቆርዕ እብ እንክር ድማን ማይ ነዲፍ ወእብ እንክር ድግለበ ህዩ ጋድም ጠፊሕ ህለ። እለ ቆርዕ ምን ለዐለት እተ ኣካን እብ እሰዉ እንክር ትነፍር?

- ዲብ ጀንቢልክ ሰለስ ሐበት ማንጉስ ህለዩ። እት ገበይክ ሰለስ ጅነ ትቃበለዉከ። እሉም ሰለስ ጅነ ሐት-ሐቱ ሐበት እግል ተሀቦም ሰተትከ። ምናተ፡ ዲብ ጀንቢል ሐቱ ሐበት እግል ትትረፍ እግልክ ሐዘከ። ሰበት እሊ ሚ ወወዴክ?

- ዎርት እናስ ዲብ ድካን እንዴ ኣተ፡ በናኑ፡ ላመ፡ በሰል፡ ጎዕ ወበጣርየት ትዛበ። ግሩሹ ክምሰል ደፍዕ፡ በዐለ ድካን “ሹክረን ፖሊስ” ቢለዩ። በዐለ ድካን ፖሊስ ክምሰል ቱ እብ ከኣፎ ኣመረ?

በሊስ እንዴ ኢትርኡ ጀርዮ።

በሊስ

- እብ ሐያቶም ለተርፈው ሕያዩም ሰበት ቶም ኢልትቀበር?
- ለቆሬዕ ማይተት ሰበት ተ እግል ትሰረር ኢትቀድር።
- ለክልኣት ጅነ ክምሰል ሀብክ ለሳልሳይ ምሰል ጀንቢል ተህይቡተ።
- ለነፈር ልባስ ፖሊስ ኣው ህዩ እሻረት ፖሊስ ዐለት ዲቡ በህለት ቱ።

መራዐየት ዓፍየት ኣንያብ ኣግሩዝ ወኣጅኒት

ሳረዮት ኣሸዐሾት ኣንያብ

ጅነ ዲብ ኣንያቡ ኣው ነከኩ ውጀዕ ሐቆ ትሰምዐዩ፡ መብዝሐ ዶል እብ ሰብብ ኣሸዐሾት ኣንያብ ቱ። እት ክእነ ቴለል ምሰል ሐኪም እንዴ ትጋሚክ ሰራይ ውጀዕ እግል ተሀቡ ለኣትሐዜ። ሐቆ እሊ ዲብ ሐኪም ኣንያብ እግል ንንሰኡ ወጅብ። ሐኪም ኣንያብ ለኣሸዐሽ ኣንያብ እግል ኢልህሌ ለወጅብ መርመረ ወዴ። ሐቱ ዶል ለሰብብ ናይለ ሕማም ሐቆ ኣመረ ክምሰል ኣትሐዘዮቱ ሰራይ እግል ለሀቡ ቀድር። ሐኪም ኣንያብ ለትበልዐ ኣንያብ እግል ኢልህሌ መርመረ ወዴ። ኣትሐዘ ምን ገብእ ህዩ ኣሸዐሾት እግል ለኣክድ እሻዐት ወዴ። እሻዐት ህዩ ኣካን ወርሕብ ናይለ ኣሸዐሾት ኒብ ተኣርኤ።

ምልኣት ለትበልዐ ኣንያብ

ሐኪም ኣንያብ እግል ለትበልዐ ኣንያብ እብ መጽረቢት እንዴ ወርከ እግል ምፍራቅ እብለ ትፈናተ መምልኢ መልኣ። ለመምልኢታት ፕላስቲክ ኣው ህዩ ሕበርበር ናይ ሐጺን እግል ልግበእ ቀድር።



ሚ ጅንሰ መምልኢ ክምሰል ትትነፈዕ ለብልዕት ለህሌት ኒብ ተሐድዱ።

ክእብሊ ሕርያኑ፡

- ግላሳይኖመር (G.I.C)
- ኮምፖሲት(Composite)
- ሲልሽር ኣማልጋም



(Amalgam)
ኮምፖመር(Compomer)

እት ክእነ ቴለል ለጅነ በንጅ ሰበት ገብእ እቱ ውጀዕ ኢልትሰምዑ። ዲብ ኣወላይት ደረጀት (Enamel Caries) እብ ሸፋግ ራድኢት ሐቆ ገብኣት እግሉ፡ እግል ልሕዩ ኣው ህዩ ለኣሸዐሽ ገርብ እግል ልትከረዕ ቀድር። እሊ እግል ልግበእ ለቀድር ላኪን ለኣንያብ ለገብኣት ርስሐት በህለት፡ ምን ኣዘ ኣሲድ ሕር እግል ልግበእ ህሌት እግሉ። እምበል ኣትካራም ፍሎራይድ እብ ለበኩት ወመጭመጮት እግል ልሕሰ ቀድር።

- ሐኪም ኣንያብ፡

ሸፊዕ-ቅርድ (Root Canal treatment) በህለት፡ እግል ዐሽዐሽ ዓሳብ ወኣሰራር ደም እንዴ ወርኬክ እብለ ትፈናተ መምልኢ ልትመለእ። ሐኪም ኣንያብ እግል ኣንያብ በንጅ እንዴ ወደ ዲቡ ጸርቡ። ለክርበ ምን ዕንድር እንዴ ኣፍገረዩ እንዴ ኣንደፈ መልኡ፡

- ክሉ ዲብ ቅርድ-ኣንያብ ለሀለ ጽበጥ እንዴ ፈግረ ነድፍ። ሐቆ ነድፈ ኣፍ እተ ዶሉ ልትመለእ ኣው ህዩ እብ ሰራይ እግል ክልኤ ኣው ሰለስ ሳምን እብ ናይ ዶሉ መምልኢ እንዴ ትደብኣ ሐሬ እብ ዋጅብ ልትደበእ፡

- ለኒብ እንዴ ትጀግለበት እግል ትደሐን ለኢትቀድር እተ ደረጀ ሐቆ በጽሐት እምበል ነቂል ሕርያን ኣለበ።

እግል ለነኣንተብህ ዲቦም ለወጅብ ኣሻይር

- ጅነ ሕፋን ኣው ብሩድ ሓጃት ነሰእ እት ህለ ለበጥር ወለለኣትቃብል ውጀዕ ሐቆ ለህሌ፡
- ሰከር ለቡ ነበሪት ዶል ነሰእ መጺጸት ሐቆ ትገብእ እቱ፡
- ነብረ ዶል መጭር መጺጸት ሐቆ ገብኣት እቱ፡
- እበ እንክር ለወጅቡ ሕባጥ ወቅይሑ ሐቆ ለህሌ፡
- ለሕምት ኒብ እበ ህሌት እቡ እንክር ቅደድ ምራቅ ለሐብጥ

ወኣረር ወዴ፡

- ውጀዕ ዲብ ቅርድ እዘን።

ዋልዴን እግል ልውደዉ ለወጅብ

- ዋልዴን እበ ትቀደረት እግል ኣሻይር እግል ልፈሩጉ ህለ




እግሎም፡

- እብ ዓመት ውጀዕ ወዴ ለህለ ኣካናት ግንሐት፡ ለሐመት ኒብ ፈረጎት ወዕስር እንዴ ቀልዐክ ኣሻይር ኣረር ግንሐት፡


- መጺጸት እግል ሀወኖት “ፓራሲታሞል ሲርፕ” ሂበት፡ እብለ ትቀደረት ሐኪም ለኢቀረረዩ ሰራይ እግል ልትህየብ ኣለበ፡
- ኣፍ እብ ማይ ሞቀ መጭመጮት።

እትለ ደረጀት እለ ምስዓር ሐቆ ኢትነሰኣት ለኣረር ምን ኣንያብ እንዴ ሐልፈ እብ ቅርድ-ኣንያብ እንዴ ኣበለ እግል ዐጭም ዕስር ለኣደሚዕ። እሊ ዐጭም እሊ ሐቆ ትደምዐ ኣረር ድቁብ ወዴ።

መብዝሐ ዶል ኣዳም ዲበ እግል ልትሳሬ እቱ ለቀድር ወቅት እንዴ ኢገብእ፡ ዲብ ኒበት እግል ትትነቀል እቱ ለትቀድር ደረጀት ክምሰል በጽሐት እት ሐኪም መጽእ። እሊ ላኪን እግል ልግበእ ኣለበ።



ቅዱም አሳር ሚነት አዱሊስ



ሓይሳም ወሓይሳት ቄርአት ጀሪደት ኤረትሮየ ሐዳሴ፡ እት ዓሙድ መዐፍየት ለልትቀደም እግልኩም ንኡሽ ዓሙድ አሳር እብ መትሳዳይ ውዛረት እፅላም ወመፈወድየት ዓዳት ወርያደት ኤረትሮየ ልትቀደም እግልኩም ህለ። የም ህዩ እብ የውሃንስ ገብሬእየሱስ ለትዳለ እብ ክሱስ ቅድምት ሚነት አዱሊስ ለትዳለ ክቱብ ሰልፋይ ክፈሉ እንቀድም እግልኩም ህሌ። ቅራኦት በኪተት፦

እት አግዳም በሐር ቀየሕ ኤረትሮየ ለትትረኩብ ናይ በዲር ሚነት አዱሊስ ምስል ምግባይ በሐር ወምሒዋ ህንዲ ትርድት ፅላቀት ትጃረት ክም ዐለት እግለ እት ለትፈናተ ክላሲክያይ ወባይዘንታንያይ አዝቡን ለትኩተበ ወሳይቅ ታሪክ ለሐብር።

እተ ወክድ ለሀይ ምስለ እሙራት ወገበይ ዒን እቅትሳድ እት አግዳም በሐር ቀየሕ ለዐለየ ሚናት ክም ከረ በፊኒኩ ሞዮስ ሆርሞስ (ቃሲይር)፡ ክሊስማ፡ አይላ ወአካባ ናይ 700 ሰነት ወራታት ትጃረት ወናይ ዓዳት አፍካክ ትትአመር ነብረት።

ናይ በዲር ሚነት አዱሊስ 56 ኪሎ ምትር እብ እንክር ግብለት ምን መዲነት ባጽፅ እት እንክር ምፍጋር ጸሓይ ምን ምእታይ ዙለ ለትትረኩብ ተ። አዱሊስ እበ እተ ድዋራ ለነብር ሽዑብ እብ “ዐዙሊ” ለትብል ሰሜት

ትትአመር።

እለ ሰሜት እለ እብ አሳስ ሐብሬ ዐባዩለ ዐድ ዐዙሊ እግል ሐጻ ጸዐደ ለትትበህል ሰሜት ክም ተ ወድሖ እት ህለው፡ገሌ አንፋር ላኪን ለእግል ሰልፍ ዶል እትሊ ድዋር እሊ ለመጽት ጀልበት ዐዙሊ ትትበህል ክም ዐለት ሸርሖ።

እተ ሐልፈ አዝቡን አዱሊስ ምሕል ሐረከት ተጀረት ሰበት ዐለት ብዝሓም ኬትበት፡ መትመራምረት ወጀማላ ረአየም ካትባም እባቶም። እብ አሳስ እት ሰነት 2003-2004 ለገብእ ታየናት፡ ፍሒነ ሚነት አዱሊስ አስክ እለ እበ ርክብት ህሌት ሐብሬ 40 ሄክታር ክም በጽሕ ሸሩሕ ህለ።

ወሳይቅ ታሪክ ክምስለ ለሐብሩ አዱሊስ ምን 2ይ ክፈል ዘበን ቀደም መትወላድ ነብየላህ ዒሳ



ዐለይሂ ሰላም፡ አስክ 7ይ ክፈል ዘበን ግረ መትወላድ ነብየላህ ዒሴ መርከዝ ሐዳረት ወለትፈናተ መሕበራይ ወ እ ቅ ት ሳ ድ ያ ይ አምሐበሮት ገብእ እተ ለዐለት ዋውር መዲነት ክም ዐለት ልትሸረሕ። እብ ተውሳክ እለ መዲነት ምስል ክልኢቱ እንክራት በሐር ቀየሕ ረዩም ምፍጋር ጸሓይ፡ ምግባይ በሐር ወአፍሪቀ ፅላቀት ትጃረት ክም ዐለ እግል ልትሀደግ።

እት ሰልፋይ ክፈል ዘበን ወግረ መትወላድ ነብየላህ ዒሳ ለትኩተበ ፔሬፕሊስ በህለት ሄራር እት በሐር ለልብል ክቱብ እንዴ ቀርአ ወድ ግሪክ ወምስር ላቱ ተሻሻይ አርቲሚዶ ምስርዩን ፈርዑናት ምስል ግብለታይ ክፈል ናይ በሐር ቀየሕ እብ ፍንቱይ ምስል ናይ በዲር ሚነት አዱሊስ ፅሙር ናይ ተጃረት ፅላቀት ክም ዐለት እግሎም ልትሸረሕ።

እምበል እሊመ ክምስለ ሻርሐ ለህለ እት ሚነት አዱሊስ ልትጸገዐ ለዐለየ ሰፊናት ወጅላብ እብ ምድር ለመጽኦ ሸፈቲት እቦም ልትሀጀመ ክም ዐለየ እት ሸርሖ፡ መልክ አክሱም ላኪን ምን እሊ ህጁማት እሊ ዳፍፅ እግለን ክም ይዐለ ካትብ ህለ። አዱሊስ ህዩ ለእብ በይነ እዳሪ ለዐለ እግለ ሚነት ክም ዐለት



እውዐለ ወድ መሕሙድ ለልትበህል መንሰዓይ። ምን መንሰፅ ዲብ ሐልሐል ዓሊ ዲብ እንቱ ላሊ ዲብ ረአስ ከፊር ምድር መንሰፅ እብ አበርቅ ዲብ ልተላዋሕ ክምስል ረአዩ። ለወክድ ለትወለደ ዲቡ ምድሩ ሰበት ትሰፋለለ ክእነ ዲብ ልብል ሐለ።

ምን ረአስ ከፊርቱ ግል ትህደድ - ሎህ ደብነ ወነበራይ
ምን ጋዱዴ ወገዱድ - ምን ጅንግላይ ወነላይ
ምን መፍላቅ ወሸግሊ - ወምን ሽማሽግ ለፅንክላይ
መቀርቱ ለሓብዋ መርጊነ - ላውሆ ኢኮን ወቀጥፋይ
ወድ ሐፈርም ነብሮ - ቀብሁ አምር ወስራይ
ወድ ክንሬሪ ነብሮ - ሓሁ ፈጭል እግል እንዳይ
ወድ ማርያይ ነብሮ - ለሀይመ ግሁፍቱ ወርዕያይ
ወድ ሕምሩጋ ነብሮ - ወድቅ ዲቡ ክም ግንዳይ
ወድ ቤት ዓርባይ ነብሮ - ፍጡርቱ ምስል እብን ወፅጫይ፤

ከፊር ሐቅ ተሰፋጮን - በይሖት ትነቂ ወከራይ
ነብሮ ለፈሬፅ ዐድ ጀጊን - ወነብሮ ገሸመር ወድ አፍታይ
ነብሮ ወላድ ተሰፋንኪኤል - ናግፎ ምኑ እብ ግሳይ
ሓርሾይ ወድ ጀጊን - ወካምል በዐል ሐምበላይ፤

ለሒታ ለኣውለት ተአቅሎ - እት ሐወርም ወእት ምንባይ
አውል ለሰሕል ሰብኩብ - አፍ ልጋሙ ለአንገህታይ
ወለት ወድ ክፍሎይ በላታ - ወቅጡም ወድ ዘርአይ
አዴግ ሓባል ዔደረት - ማሼል ጋብእ ሀንዝራይ
ሰጋደ ለእት ክም ቡሪ - ዕሬ ምሬቱ ወተካይ
ከቦሃ ክም እት ሾከን - ጸሎሃ ክምስል ጅንግላይ
ተትነብል አለቡ - ክፋእቱ በለ ወጨብላይ፤

ረአሳ ጸዐዳ ኢኮንክን - ወኢልተሌ እብ ብላይ
ለሞታ ግርዝ ይአነ - ወእግለ ህለ ምንብራይ
ቀርበት ጸውር ይአነ - ወልትሰናታእ እግል ወዳይ
ጎማምግ ዋቂ ሐሌቡ - ወሐሰ ዲብዬ መምዐራይ፤

ሸርሖ። ክሉ እብ ምድር መጽኦ ለዐለ ወራራትመ ህቱ ኖሱ ዳፍፅ እግለ ክም ዐለ ልትሀደግ።

ዎሮት ምን እብ ክሱስ ሚነት አዱሊስ ምን ገብእ ወወራታተ ለሸርሖ ብዝሒ ለቦም ክቱባት እት 1ይ ክፈል ዘበን ሐቅ መትወላድ ነብየላህ ዒሰ ዐለይሂ ወሰላም ለትኩተበ እብ ‘Periplus of the Erythrean Sea’ ሄራር እት በሐር ቀየሕ ለልብል ክቱብ ቱ። እትሊ ክቱብ እሊ አዱሊስ ዋውርት ወርሕብ ካፊ ለዐለ እግለ ሽብህ መዲነት ክም ዐለት እት ሐድ ሰለስ ኪሎ ምትር ለገብእ

ሪም ምን ግንራራብ በሐር እንዴ ሬመት ትትረኩብ ክም ዐለት ልትሸረሕ። እትሊ ወክድ እሊ ታሪኪደት ሚነት አዱሊስ ምን 5-7 ኪሎ ምትር ለልትዋገም ሪም ምን ግንራራብ በሐር ዋድየት ህሌት። እሊ ህዩ እብ ሰብብለ እተ ድዋር ለትረኦ ነጻፍ በሐር (Retreat) ክምስልሁመ እብ ውሓይዝ ሐዳስ ወዐሊ ገዴ ለደንን ጨበል እግለ አግዳምለ በሐር እት ደፍን ሰበት መጻ ወምኑ ለጀረ እግል ልግበእ ክም ቀድር መትመራምረት አምር ምድር ሸርሖ።

ልተላሌ.....



ጊዜውን ያደብ

ሕዳግ ሰሌዳ



ቫብዕሉም አሳስ መቅቀዳም ቱ

እሊ እቱ ለህሌነ ዘበን መንበረት እግል ትሳይር ገብአክ ምንገብእ ለአግደ ጽዋርከ ዕልም እግል ልግበእ እት ወጅበከ ብዝሓም ሽባን ምን መዳርስ እንዴ ፈግረው እት ናይ ዶሎ እትይ ለረክቦ ምኑ አሽቃል እቱ ፍሩራም እንረክቦም።

እሊ ህዩ እት በዝሐ ብሩር ዐድነ ልትርኤ ለህሊ ዛህራት ጋብእ ህላ፡ ሰበቡ ብዙሕ ምንማቱ። ጭመሙ ላኪን እንተአምር እብ ርሕከ ወመስተቅበልከ መተልሃይ ሌጣቱ። እግልሚ ማሌ ክም ዮም ክም ኢትገብእ ወዮመ ህዩ ክም ፈጅር ለትገብእ ዕለት ክም ኢትን እት ንአምር እንበዴ ሰበት ህሊናቱ።

እትሊ ኢያም ቅሩብ ምን ብሩር ዐድነ እንዴ መጽው መጽል አድረሶት ደርሶ እንዴ ጸንሐው እብ ሽሃደት ለትደሐረው ሽባን ምስሎም እንዴ አምሐበርን ተዐሊም ወፊህም ሽባን እትሊ መጽል እሊ ለከሰስ አስእለት ህሩሳም ምስሎም ዐልነ ህቶመ እት አስእለትን ለመስሎም ረአይ ሃይባምን ህለው።



ሻብ መሐመድ ሰዲድ ሳልሕ ምን መዲነት ነቅፋቱ፡ ህቱ እብ ክሰሰ አቲህ እት ኩልየት መዐየ አሰመረ እት ልትሃጌ ክእነ ልብል።

“ምን ዓሰራይ ፈሰል ሐቀ ሐለፍኩ ወእሊ በክት እሊ ክም መጸ እግሉ ሐሬኮ ወእት ኩልየት መዐልሚን መዐየ አሰመረ እንዴ ተሓበርኩ ክልኤ ሰነት ናይ 11 ወ 12 ፈሰል ድራሳቼ አትመምኩ” ክም ቤለ ፈሀሙ እብ ሽሃደት አድረሶት መደሓሩ ከፎ ክም መሰል እግል ንድሌ ስኡላሙ ዐልክ፡ ህቱመ እትሊ ንቅጠት እሊ ረአዩ እት ለሀይብ ክእነ ቤለ። “እሊ እግልዬ ክም መአንበት ሰኔት ሐሰቡ፡ እግልሚ አዜ ናይ ሽሃደት ድራሰትን እንዴ አትመምኩ እብለ እምትሓን ማትሪክ እቱ ሻረክነ ወፍገሪትናመ ርእያመ ህሌክ፡ ምን እሊ ወሐር ህዩ እብ ዲፕሎማ ወግራሁ ህዩ እብ ዲግሪ ወምኑ ወለዐል ለህሊ ደረጃት እብ ድራሰትን እግል ንኡትምም በክት ለፈቲሕ እግልናቱ እብለ እሊ ሽቅል እሊ። ለዐበ መሻክል ኢመትቀዳም



መስተቅበል ጋብእ ለህሊ እሎም ዮም ለህለው ሽባን ምን መድረሰት ግረ ለሐረጋርን ሰበት ህለው እግሎም ነሲሐት ህሌት እሉ ሻብ መሐመድ ሰዲድ።

“ወላሂ ለሽባብ ለአዜ ህሌት ድራሰት እግል ዲመ ለትነፈዕ ወምስል ዘበን አካን ለበ ክምተ ኢለአምሮ እንዴ ኢገብእ እብ ናይ ዶሎ ሀገጊት ወሐያት ልትቀሸሸ ሰበት ህለው ቱ። መሰለን ለበዝሐው ሽባን ዮም “ዳርስ ወኢዳርስ ክሉ እበን ባልስ!” ልብሉኩ እሊ ታምም ጦግ እሊ ህዩ ሰኔ ወእማን ተአሲር ወዲ እቶም ህላ። ህቶም ላኪን እንዴ አፍየሐው ምን ለሐሰቦ ፍንጌል ዳርስ ወለ ጃህል ለህሊ ፈርግ ሰኔ ወእማን ዋድሕ ቱ። ለዳርስ ምን ለሐምቅ እኪት ወሰኔት ለአምር ወእግል ሐያቱመ አሳስ ለከሬቱ፡

ለ ኢ ዳርስ ላኪን እበ እሊ ጌለለዉ ለልትጌለል ወ እ ብ ወ ረ ቀ ት ሕ ር ዶ ሁ ለገይሰ ቱ። ሰበት እሊ እግል እሎም ሽባን እሎም እግል ኢበለ ለሐዜ ዕልም ኖር ቱ ኖሩ እግል ልሕዬ ለሐዘ ድራሰት እንዴ ኢቀብበ እግል ለአተላልያ ቡ፡ ኢፋልዬ ለቤለ ህዩ ፈጅር እግል ሽቅል ነሐር ወጅርስት እግል ልትዳሌ ህሊ እግሉ እብለ” እት ልብል ነሲሐቱ አትመመ።

ምን ረወራት ነቅፈ እት ረወራት ማርየ እግል ንትዐዴ፡ እት መናሰበትለ መድሐራት ምን ደሐረው ሽባን ዎሮ ሻብ ያሲን ሓምድ ምን እዳረት ደዋይሕ ቀርጸት ምዴርየት ሐልሐል ቱ። ህቱመ እብ እንክሩ እሊ በክት እሉ እብ እግል ልትነፈዕ እንዴ ቤለ ቀደም ክልኤ ሰነት እትሊ ኩልየት እሊ እንዴ መጸ ድራሰቱ ለአትመማቱ።

እብ ከፎ እትሊ ኩልየት እሊ መጽአ? ለሰኣል ዲቡ እት በልሰ ክእነ ልብል፡-“ለበክት ሰበት መጸ ብዝሓም ለኢፈሀመዉ ዐለው፡ እግልሚ እት ድዋራት ለሀይ ክእነ ለመሰል አብክት እግል ሰልፍ ዶል መጽእ ሰበት ዐላቱ። አነ ላኪን

ክም መጸ እግል እትነፈዕ እብ ሰበት ሐሬኮ ወእበ ተሀየቤን ሽርሕ አብክት ብዙሕ ለበ እት እንቱ ሰበት ረከብኩዉ ሐሬኩዉ”።

ተዐሊም እብ ናይክ ፈሀሚ ሚቱ እንዴ እንቤ ስኡላሙ ዐልነ ሻብ ያሲን፡ ህቱመ ለሰኣልነ ክቡድ እቱ እት መሰል ክእነ ቤሌኩ- “ተዐሊም ተርጀመት እግል ሀቡ እግልክ ኩብድ እቼ፡ እግልሚ መንበረት ቱ፡ ሐያት ቱ፡ ኖር ቱ፡ ገበይ ቱ፡ ለኢልትከለሰ ርዝቅ ቱ፡ ተዐሊም ክሉቱ ክም ቤሌ፡ እሊ ሽባን ዮም ከፎ ልርእዉ ህለው ብህላሙ ዐልክ፡ ህቱመ እትሊ እት በልሰ ክእነ ቤለ።

“ሽባን እት ተዐሊም ለህሊ እግሎም ፈሀም ሰኔ ለልአስፍቱ፡ እብ ናይ ዶል ዝሩፍ እዲነ እንዴ ትቀሸሸው መድረሰቶም እት ምግብ እንዴ ሐድገው እት ሽቅል ነሐር እንዴ ትፈረረው ለሀብቶም እት ርቡዕ ሰከር ወቡን ዘፍፍ ህሌት፡ ፈጅር ላኪን እሊ ዮም ለህሌት ፍርስት ሰበት ኢረከብ እግል ዲመ እት ልተዐሶ ለነብሮቶም። ሰበት እሊ ዕልም እሻረት ዐቅል ወመትቀዳም ሰበት ገብእ ለገብእ ሻ ብ



ለሐረስታይ፡ ለፓይሎት ወክሉ ዕሉም ህቱ ለአፈርዬ፡ ሰበት እሊ ሐሬኩዉ።

እምበል እሊመ እብለ ገበይ እሊ ብዙሕ አብክት ሰበት ብክ እብለ እት ነአደርስ እብላማ ናይ ኩልያት ድራሰትን እግል ነአተላሌ በክት ለፈትሕ ገዛም ሰበት ገብእ እበ አቱኮ እቱ ለቤለ ሻብ ኢብራሂም መሐመድኑር አሕመድ ቱ።

ሻብ ሕሲን አድም መሐመድ እት ቀበትለ ብዝሓም ምን ህለው መደርሲን ውላድ ሕዳረብ ምን መንሱረ ለመጻቱ፡ ህቱ እብ ክሰሰ ተዐሊም እት ልትሀጌ ክእነ ልብል፡ “ምጅተመዕ ሕዳረብ ወእብ ፍንቱይ ሽባን እት ተዐሊም ለህሊ እግሎም ምዩል ሐዋን ሰበት ህሊ እሊ ምኑ እንዴ ትባልሐው መ ን በ ረ ቶ ም ወ መስተቅበሎም እብ ተዐሊም እግል ለአድሙኖ ወጅቦም፡ አዳም እምበል ዕልም ክምለ ልትጌለል ሐዋን ዐድ ሌጣቱ፡ ሰበት እሊ ለሐውዬ ለእሊ በክት እሊ እት ህሊ እግሎም ለኢትዐለመው ተዐሊም እብሎም እት ልብል ነሲሐቱ ቀደመ እግሎም።

ሻብዐብደርሕማን መሐመድዐሊ ሳልሕ ምን መለብሶ ለመጸ ሻብ ቱ፡ ህቱ እብ ክሰሰ እሊ ራክቡ ለህሊ በክት እት ልትሃጌ ክእነ ልብል። “ወላሂ እማን ተሐይስ ሐውዬ ቀደምዬ እንዴ መድረሰቱ አትመመ ለትደሐረ ምኖም ነፈር ሰበት ይህለ እሊ ናይ መድሐራት ክም ኬር ዋሌት እንዴ ነሲሐው አሰርዬ እግል ልተለው ሰአየት ለተአወዴኒቲ፡ እግልሚ እት ሐቱ ቤት መትቀዳም እብ ተዐሊም እግል ለህሌ ገብእ ምንገብእ ምን ለሐውን ዎሮት ድሐር እግል ለህሌ እግልካ ቡ፡ እምበል እሊመ ዮም ምስልነ ደርሶ እንዴ ዐለው እት ሽዋርዕ መለብሶ እት ለፎ ለሐደግናሆም ሽባን እታሆም እት እንቶም እንዴ ተቅዩር ኢለአመጽኦ እንዴ ትደሐርን እብ ሽሃደትን እንመጽኦም ህሌክ፡ ወአኪድ አነ እሊ ዶል ልርኡ ህቶም ወዳይላቶም እግል ልተዐሶቱ፡ ከእብለ መናሰበት ሽባን

ድራሰት አሳስ ክሉ ሰበት ገብአት ምን አውለውያት ሐያቶም እግል ሊደወ እትፋኑም።

ሻብ ያሲን መሐመድኑር ዐሳማን ወድ ዓምር ምን ምዴርየት ሰነይ እት ኩልየት መዐልሚን እንዴ መጸ ምን ትደሐረው ሽባን ቱ። ህቱ ምን ብዕዳም እብ ፍክሩ ፍንቱ ለቤለ ሻብ ቱ፡ እት ድራሰቱ ምን ፈደበው ደረሰ እት እንቱ ልሄርር ሰበት ዐለ አዜመ እት እምትሓን ማትሪክ ናይ ዲግሪ ንቃዋ ለአምጽኦቱ። “በደል እንዴ ማትሪክ ወዴት እት ብዕድ መጽል አቱ መጽል አድረሶት እቱ እግል ኢቱ ህሊ እግልዬ እንዴ እቤ እትሊ ኩልየት እሊ እንዴ አቱኮ ትደሐርኩ” ቤለ ያሲን ከልፍየት ምጽቱ እት ሽርሕ።

ሻብ ያሲን በሲር ቱ፡ እሊ ምስክነ እሊ እንዴ ጸረ ደረጃት ሰኔት እግል ለአምጽኦ ለሰደዩ ምስጢር እግል ንአምር ስኡላሙ ዐልክ።

“ወላሂ ለሽቅል ናዩ ሌጣ አኪን፡ ክል ነፈር እዴሁ ለአቱ እቱ ቱ። መደርሲን ደረሰ ወዋልዳንዬ ሰበት ሰደውኒ እሊ ደረጃት እሊ በጽሐኩ፡ ዮም እብ 3.45 እብ ሽሃደት ደሐርኩ እት ማትሪክመ ንቅጠት ሰኔት እንዴ አምጽኦኩ



ሐለፍኩ፡ ሰበት እሊ ለሽባን እግልዬ እግል ልርእው ህሊ እግሎም፡ አነ ምስል ክል መሻክልዬ ጃእዘት እነሰእ እት ህሌኮ ፍሬ ጅህጃ ክምስልቱ እግል ለአምሮ ቦም እብል፡ እግልሚ ለበዝሐው ሽባን እበ እት ተለፍዝየናት ለልርእዉ ምድር ወሐያት እት እግል ልንበሮ ፈዝግም እት እንቶም ልትሐሎሙ ከምን መስተቅበሎም ለአወልጦ ሰበት ህለው ቱ”፡ ሰበት እሊ ምህመት ዕልም እንዴ አመርኩ ክም ሽባብ ትቀደረ እግልን ምንገብእ ብዙሕ ምህናት እንዴ ደረሰነ እት ሽቅል እግል ንትፈረር ብክ ቤለ።

እሎም ዮም እብ ደረጃት ሽሃደት እንዴ ትደሐረው እግል ተድራብ ዐስከሪ አስክ ሳወ እትሊ ለሐልፊነ ሰነብት እት ዮም 29 ጃላይ አስክ ሳወ ለትወከለው ሽባን መደርስ አሳስ መስተቅበል ክምስል ቱ ሰበት አምነው እቡ ወደምነው ሽሃደቶም እንዴ ረፍዐው ሳወ ልትከረው ህለው፡ ምኑ እንዴ አቅበለው ህዩ ዕልም እግል ልካፍሎቱ።



እግል አድረሰ ህሊ እግሉ እብለ”።

ለበክት እት ዓሰራይ ፈሰል እት እንደርስ መጽነ እት ወክድ ለሀይ ቀደም ክልኤ ሰነት ቱ፡ እት መድረሰት 2ይት ደረጃት ሀይቶተ እደርስ ዐልኩ፡ ምህመትለ በክት ሰበት ርኤኮ ህዩ እብ ናይ ኖሼ ምራድ መደርስ እግል እግበእ ሐሬኩ፡ መደርስ እብ ራትዐት ዕን ዶል እንርእዩ ዒማት ክል ግም ዕሉም ቱ ለመሀንድሱ ለሐኪም፡



እብ መክበር ወጠኦ ሽባንቱ ወደረሰ ኤይቲፍ ለፍትዖሌ ሰፍቲቲ

ክብርን፤

ልባብ

እኪት እብ ሰኔት ዳንክ

ዎሮት ጀኔታይ እስኢት እትለ በሐር እንዴ ወድቀት በዴት ምኑ። ለጀነ ህዩ እተ ሐጻ ለእተ ግንራራብለ በሐር ዐለ እቱ፤ “እለ በሐር ሰራቂትተ” እት ልብል ከትቤ። እት መሳፈቲት ምኑ ህዩ ዎሮት ዓሰ ለገፍፍ እናስ ዐለ። ለእናስ ህዩ ምነ በሐር የም አለቡ ሰመክ አፍገረ። ከዲብለ ሽምሸመትለ ግንራራብለ በሐር፤ “እለ በሐር ሰኔ ጸጋይትተ” እት ልብል ከትቤ።

ዎሮት መንደላይ ህዩ ዲብለ በሐር ዶል ትከረ ለማይ ሸትፈዩ ከእተ በሐር ቶቀ። እሙ ህዩ ለጀናህ ክም ሞተ ምኑ፤ ህታመ ዲብለ ሽምሸመት። እለ በሐር ቄትላይት ተ እት ትብል ከትብት...!! ዎሮት እናስ ድግለል ህዩ ሉለት ረክቤ፤ ከእተ ሽምሸመት ለበሐር፤ “እለ በሐር ሄይባይት ተ” እት ልብል ከትብ.. ! ሐቆ መደት

አምዋጅለ ባሐር እት ልትባለስ እንዴ መጽኡ፤ እግለ እተ ግንራራቡ ክቱብ ለዐል ዝዶታት ክሉ እንዴ ሐጽበዩ ተሀርበበ እቡ..ከለበሐር ሃድኡት እት እንተ ተርፈት። “ከበሐር እግል ትግበእ ተሐዚ ገብእክ ምን ገብእ። ብዕዳም ለልቡሉ ክሉ ረእሱ ባልክ ኢተሀቡ” ትቤ።

እብ ሐዮትኩም እት እንቱም እት ሕድ ረሐሞ ወሕድ ፍተው... ወለመስንዮትኩም ወሐትነትኩም እግል ልተላለየ ገብእየ ምን ገብእ። ለሳድፈኩም ጌጋታት ምስሕዎ። ወጀላብለ ጌገ እንዴ ትብው ሐትነትኩም ወመስንዮትኩም ኢትምሶሐ። ከኢገበዩ እተ ትሳድፈኩም እቱ ወቅት። እት በለስ ትሩድ ኢትፈክር። ምናተ ለሐሰ ወለተዐገለ በለስ እቱ ሕሰቦ። ከእኪት ወሰኔት ምዶል አክል ሕድ ተን። ለእኪት እብ ሰኔት ዳንክ።



ለለኣትፈክር መዕሉማት

- ቀወሬዕ እብ ገኛበተን ማይ እግል ልምጠጠ ቅድረት በን። ወምን እሊ ወኬንመ ምን መንዲል አውመ ግጥዐት ቅማሽ ጥልት እግል ልምጠጣው ቀድረ።
- ተብዔናይ ምድር እት ክልኤ ከፈልካሁ ምን ገብእ። ለክልኤ ክፍለቱ ሐቲህንክ እብ በይነ እግል ትምበር ትቀድር። ወእብላሁ ምስል ወቅት እት ለዐቤ እንዴ ጌሰ ለባድየት ህሌት ክፍለቱ እንዴ በልሰ ክመ እት በዲሩ ለዐቀብል።
- ሐሺል ተብዐት እት ሐያቱ ክልኤ አንሳት ኢልሀዴ። ከለሰልፋይት እሲቱ ሞተተ ምን ገብእ። እባሁ መምብል። ምናተ ለአንሳይት ብእስ ሞተ ምን ገብእ ብዕድ እግል ትትሀዴ ማሬ አለበ።
- አርፄ ወለ ረእሱመ ቀረጭክ ምን ገብእ። አሰክ 30 ደጊገት ለገብእ ወቅት። ለናይ ነኪሽ ቅድረቱ ኢለአበድዩ። በህለት እግል ልንከሸ ቀድር።
- አቅሕሞ ሰኔ ገያዲት ህሌት። እለ አቅሕሞ እለ አሰክለ መሳክብለ እተ ድዋራተ ለልትረከበ ብዕዳት አቅሕሞ ህጁማት እንዴ ወዴት። እግለ ዲብ እለን መሳክብ እለን ለሀለ ማላት ትዘምት ወእግለ መልካትለ አቅሕሞ እንዴ ቃተለት። ገለ ምንለ አቅሕሞ ህዩ ምስለ እግል ልሸቄ ወአግብር ናየ እግል ልግበእ ትቀሰብ።
- እግል ሐቲ ሸክል መረበዕ ለበ ወረቀት። ትዕቤ መትንእሸ ምን ሰማን ዶል ወለዐል እት ረሐ እግል ትዕጸፈ ክሉ ረእሱ ለልትቀደር ኢትን።
- እብ ገበይ ዕልምየት። ጠማጥም ክም ፈክሀት ልትሐሰብ። ወሞዝ ህዩ ክም ሰዐር።
- ድራሳት ዕልምየት ክምለ አከደያሁ። ተናን ሰጃይር ምንለዐል 200 ሰመማት ላተን መዋድ ክምክም። ወለ 40 ምን እለን መዳት እለን ህዩ ምስምስ እግል ሕማም ሰረጣን ለገብእ መዋድ ተን።

በህል እ'መራም

- አርበዕ መንበ ክሎም ለወድያክ ጋራት፤ አደብ። ዕልም፤ ሸፈኞ ወእማነት ቶም።
- ዋልዳይ ቀለጥ ውላዱ ሐቤዕ። ውውላድ ቀለጥ ዋልዳይ ሐቤዕ፤ ወሕሳቦም ለወዱ ህዩ ብዞሕ ኢቀልጦ።(ኮንሬሾስ)
- “ዎርት ነፈር እት ለቀድየትክ እት መጦርክ እግል ልብጠፎ ሐዚካሁ ምን ገብእ። እት ሰልፍ እንተ ለናይ አማን መስኒሁ ክም እንቲ እትአምኑ።” (ኦብራሃም ሊንኮሊን)
- አሚር አክል ሕድ ተረቱ ክም አሚር እግል ልውዴ ብዲበ። ወመሕኩምመ ክም መሕኩም እግል ልግበእ ብዲቡ ወዋልዳይ ክም ዋልዳይ ወውሉድ ክም ውሉድ እግል ልበእ ወጅብ። (ኮንሬሾስ)

ሰኔት ለረክብ ሰኔት ወዴ

ሐቲ ምዕል ዐረብየትጅ እት እስውግ። ወእት ፍንጌ ክልኡት ዐድ እሳፍር እቱ ለዐልኮ ወቅት። መሕፈዘትለ ሰላዲይ እት ቤት ክም ትረሰዕክወ አመርኮ። ወዲብለ ዐረብየትጅ ለዐል በንዚን ምነ እትቀደሚይ ለእረክበ ለቀርበት መሐጠት በንዚን ወኬን ክም ኢለሓፈፈኒ እሙር ዐለ። እትለ አፍለ ባብለ መሐጠትለ በንዚን እንዴ በጠርኮ። አሰክ ዎሮት ምሳፍር መጽእ እታኬ ዐልኮ። ሐቆ መደት ዎሮት ዐባይ ሸሕነት ለሰውግ ነፈር መጽኡ። ሸክ ዋዲ

ዲብ ኣነ እብ ምልሃዬ ቅርብ እቤሉ። ወለተዋልልዬ ደገምኮ እሉ። ወአሰክ ቤት ለአቀብል እቡ በንዚን እግል እምለእ ቅሩባይ ማል እግል ልሰልፈኒ ትሰእለክወ። ምናተ ህቱ ላተ ከዛንለ በንዚንዬ አሰክ አፋሁ እንዴ ኢመለእክወ. ቤለ ወእተ አፋ ረግሐዬ። ወለተበኑ እንዴ ደፍዐ እግልዬ። ሐቲ ምዕል ክም እለ ናይክ ምሸክለት ሳደፈተኒ። ሐር ዎሮት ነፈር ክምእነ ኣነ ኣዜ እግልክ ለወዴክወ ወደ እግልዬ ቤሉኒ። ወእት ዐረብየቱ ትጸዕነ ወገበዩ ተአልበጠ።

ዝበድ

ዝዶታት

እዲናክ እብ ገጽ ፋሬሕ ትከበት። ወእግል ክሉ እት ድዋራትክ ለልትረከብ ገጽ ባርህ አርእዩ። ወክል ዶል እትለ ለውቁክ ጋራት ሕሰብ.. ወሀመት ለጀልቦ እትክ ሰነዕ ኢትሕሰብ እቦም። ሰእየት ህዩ ደዋ ተ። ወሀመት ጅርሰት ተ። ወመትፋዋል ህ ዩ ረሕመት ረቢ ተ።

ለለኣትፈክር ብሂላት

- እናስ ለበዝሐ ጋራት ፈቱ።
- ዲፕሎማሰየት ፈን ውብሰርተ። እሊ ፈን እሊ ክልብ ከለም ዶል ልትከበተኩ። እንዴ ደንንክ እበት አሰክ ተሀርሱ። እለ እንተ ከልብ ክፎ መላእከት እንተ እግል ቲበሉ ለትቀድር እቡ ብሰር ተ።
- መሰሎት። ሐቲ እብ በይነ እግል ዲበ ለህለው ፍራስ ለነአጣቄዕ እተ ሐሰት ተ።
- አከደለ ተዋልልክ ላዝም እግል እዳግሙ ብእትዩ ትብል ሐቆ ገብእኩ። ለመሳኒትክ ሕኔት ተሃልግ እቡ። እግል ዕድዋንክ ምን ትዳግሙ ለሐይሱ። ህቶም ሰኔ ርይሓም እት እንቶም እዘን እንደ ከረው እግል ለአተንሱካ ቱ።
- ሐያት ወድ ሚን ኣደም ክታብ ተ። ምናተ ምን እሊ ክታብ እሊ ምን ሐቲ ሰፍሐት ወለዐል እግል ልቅሮኦ ምኑ መቅደረት ለዎም አንፋር ሰኔ ሐዳም ቶም።
- ሕነ አርበዕ ምነ ሐምስ እዴ ዕምርነ ዲብ ሸቅል እንዴ ነሓልፈን። ለታርፈት ህሌት ሐቲ ሓምሳይት እዴ ዲብ ራሐት ወለውቀት እግል ነሓልፋ እንከድም።
- ዎሮት እናስ እግል ሐቲ እሲት። ህተ ልብ (ረሕመት) ክም አለበ ዶል ልተሀመ። እምበል ሸክ። እለ እሲት እለ ልቡ ጋልየት ምኑ ህሌት።

በህል

- ርሐ ለቀብብ እብ ብዕዳም ህዩ ሰኔ ወአማን ቅቡብ ቱ።
- ለሰክበ እምበል ልትሐለም ሚኢኮን።
- ክለ እት ባክ ልህሌት ግርመት እዲነ ተርጀመት አለቤ። አሰክመ እንተ እብ ዕን ግርም ይአቅመትካህ።
- መዋዲት ግሉል እብ አዚም ትትዐደዩ። ወከራህየት እብ ዘዐት ዕግል ትትዐደዩ።
- ወድ ኣደሚ ወድ ሰብ ሐቆ ገብእ። ምን ሕሽመት ብዕዳም ለተአንቅስ ዘዐት ምን አፍሁ ኢትፈግር። ወሽዑር ብዕዳም ለለሐክር ውዳይ ኢወዴ።

ተብሰም

ዎሮት ነፈር አምዕል ዐረፈ ጽምክ ምን ገብእ። ናይ ሰነት ካምለት ዝኩብክ መቅፋር እግልካቱ ቤለወ። ከጸም አንበተ። ወሐር ሰር አምዕል ክም በጽሐ አፍዋረ። ህቶም ህዩ መለሀይ ደሐንካ ቱ ሚ ጀሬት እትክ? ቤለወ።ደሐን ቱ ኣነ ሰስ ወሬሕ ከፍያኒ ቤለዮም።

መዕሉመት

እት ሰልፍ ክሎም እግል መአሰሳት ሰርፍ። ባንክ ለትብል ሰሜት ለሀበው ጥልያን ቶም።

ቃሎት

እዲነ

እዲነ ምነ እንተ ለሀብካሃቱ ወለዐል ሐቲመ ኢተሀይበኩ። ወምነ እንተ ኖሰክ እግል ርሕክ ልክልኣካሁ ወለዐልመ ኢትከልኣኩ። እዲነ መዐፍየት ዐመልክ ወቃሎት አቅዋልካ ተ። ብዕዳም እግል ለሓሽመክ ትትሸክህ ገብእክ ምን ገብእ። እንታመ ብዕዳም ሓሸም... ሰዳይት ብዕዳም ተአኖኬ ገብእክ ምን ገብእ። እንታመ ብዕዳም ሰዴ...ወብዕዳም እዘን እንዴ ከረው እግልክ እግል ለአተንሱክ ወልፍሀመክ ትትሸክህ ገብእክ ምን ገብእ። እት ሰልፍ እንተ እዘን ክሬ እሎም ወሰኒ እንዴ አተንሴካም ክም ትፍህሞም ግበእ..ወእንተ እብ ሰብር ኢታሌካም ምን ገብእ ህዩ። ዎሮትመ እግል ለአሰብር እትክ ለቀድር ክም ይሀለ አምር። ከየለ አንብት። እለ ቃሎት እዲናተ..ለእለ ሓለፍክ ሌጣ ተ ለትጸንሐክ ወለእለ ይሐረስክ ኢትብትክ።



2ይ ክፋል

ዶክተር ከዳሪ፡ ለረአዩ ከልብ፡ ናይ ኦሮት ገልገላዩ ክምቲ እምበል ሸክ ተአከደ ምኑ። ላኪን ሸቀላት በይኣቲ። በዲር “ምን ባዕሉ ምን ኢልትፈንቴ ዮም እትለ እሱብዳልየት ሚ ኣምጸኣቲ፤ እት ቀበትለ ብናለ እሱብዳልየት ህዩ እብ ከኣፎ ኣተ፤ ምስል ምን ማጽእ ለሀሌ ገብእ፤ ለገልገላዩ ባዕሉ ሐ’መ ከማጽእ ሆ’ለ ገብእ፤” ዶክተር ከዳሪ ዲብ ሕሳባቱ ሰኣለት ብዞሕ ተንክረ። ምናተ ምን ልብለሰ እግሉ።

ምን ሐረስ እሊ ክሉ ለጋር ተአገመ ዲቡ። ምን ቅሩብ እንዴ ሸእገዩ ምን ትፋጠነዩ ህዩ፤ እት ክሉ ለጎሮቡ ወዝያደት ህዩ ዲብ ረኣሱ፡ ደም ለሰጥጥ መዛብጥ ወሸረንርብ ክም ሆ’ለ ዲቡ ተአከደ። ሰኢ ወኣማን እግል ለኣጥመእንን ምኑ እንዴ ቤሉ፡ እብ እዴሁ ጣሰሰዩ ወሻመለዩ። ለከልብመ እንዴ ልትሸምሐር ሀበይ-ሞተ ገብኦ እግሉ። ክምስለ እዴ ዋልደይት ለትጣሰሱ ውላድ ሰፍሉል እንዴ መስል፡ ዕንታቱ ክምስለ ሰክብ ለሀለ ኣሸለማለመ እግሉ።

ዶክተር ከዳሪ፡ ለመዛብጥ ምን ክም ወደዩ ዲቡ እግል ለኣምር ኢቀድረ። ለእሱብዳልየት ሰኢ ፋይሐት ወኣብያተ ብዞሕ ሰበት ዐሉ፡ ለዲብ ለከድሞ ኣንፋርመ እብ ሰቡብ ብዝሐ ሸቅል ምን ቃልሱቶም ልትራከቦ ለዐለው።

ለእብ ንዛም ወገበይ ፍጥር ለትሸተሉ፡ ቅያሰ ለኣለበ ሕንቃቂ ወመራዐየት ረክብ ለዐሉ፡ ሰርጎለ ሐውልየትለ እሱብዳልየት ለዐለ ክል-ኣብሁ ለኢተኣመረ ኣጅናስ ዕጪይ ከተክት ወዕምባታት፡ እብ ግርመቱ፡ ገማለቱ ወጀላሉ ዓሬ ለወጅቡ፡ ዕንታት ለሳሬ ወደሚር ለረዩሕቱ። ለእብ በሰር ወፍጥር ፈን ለትቀረጨ ክል ጅንስ ረስማት ለቡ፡ እብ ጼነ ቅዱይ ለሰራሰር ፈርያቱ፡ ሕሙም ለትሳሬ ረእየቱ፡ ለእብ ሙሀንድስ ለትማተረ ቅያሰለ ጸብጡ መባትክ ምድር፡ ዲብ ዐዝለቱ ለለኣጸሎ ሐማይም ወዴዶም፡ ክም ሓባር ሰረይር ግሎት ነሀር ኣማዞን ለትፈናተ ሓባር ለቡ ልባስ ለላብስ ኣዳም ኬን ወእንሰር እንዴ ለኣውሀሌ፡ ሐንቴ ዕጪይ እብ ኣሰመንቲ ለትለቅለቀ መጋሲት ኣዳም፡ እብ ነዳፊቱ ለለኣትፈክር ኣዳም ወመካይን ለልትሐላለፍ እቡ ኣግብይ፡ ዐስተር ድቡኒት ወጸሓይ ከጃሊት፡ ክሉ እንዴ ዐፈካሁ ኢትመሸግ ምኑ።

ቅሶት “ሕሸኪቶ”

ኬትባይ ሙደርስ ማሕሙድ ዑመር (ወድ-ዲኒ)



ዶክተር ከዳሪ፡ ለዲብ ሐንቴላ ዕጪይ ጋምል ለኣጸሎ ለዐለው መዋጥኒን፡ ምን እግል ዕደዳን ለመጸውቡ በናነ፡ ኣራንሺ፡ መንደሪን፡ ዘይቱን መንገ ወብዕብ እንዴ ቀርፈው፡ ሕያይ እግል ሕሙም ወሕሙም እግል ሕያይ ለሀይከ እግል ለሀይ እንዴ ላውሽ ሐቆ ረኣዩ፡ እብ ከብዱ “ኣሰናይ ምን እሊ እብ ዓዳት ራሕመቱ፡ ወጽጎቱ ለልትሌለ ገቢል ትከለቅኑ!” እንዴ ቤለ እብ ደሚሩ ኣቅረዳ ወተሐበነ። ህቱ ክምስለ ስሜቱ ለተሐብረናተ፡ እብ ኣደቡ ኣልከደር፡ እት ሸቅሉ ራሒም ወበዐል በሰር ወመንበረቱ ዲብ ገዚረት ኣክደርቱ ለዐለ። ዶክተር ከዳሪ፡ ናይ ኣል- ኣክረ ጅነት ኢደለ ሊኢኑን፡ ናይ እድንዩ ንዕመት ላተ ራክበ ዐለ። ምላዐል ክሉ፡ ምን ክሎም ለሐማይም ወሴድዮቶም ትውሕዝ ዲቡ ለዐለት መድሐር፡ ዕ’ሰ እንዴ ትመልኦ ትጀሌሕ ዐለት።

ምን ምብጣርም ሐቆ መዴተት፡ ለከልብ ኣሰክ ጎፍ ከደን ናይለ እሱብዳልየት እግል ለሀረክርክ ኣንበተ። ለዶክተር ደርቡ ገይስ ሆ’ለ ሚተርፈ ምኑ እግል ልትኣከድ እንዴ ቤሉ፡ ግራሁ እንዴ ትወለበ ግንሐት ገልገላይ ገንሐዩ። ለሐኪም ላተ እተ ኣካነቱ ክም ግንዳይ ይቡስ ቀሴ ክም ረኣዩ “ሚ ረክበተክ ዶክተር! ኣነ እግልክ እንዴ ሰኢኮ መጸኮ ወእንተ እለ ኢሰኢኮ ትወዴ፤ ዓዳት ግልግኖት ወምዝኖት ኢተኣብዴ። በዲር ፋህም ምን ዐልክ ዮም ሚረክበተክ ከኣሰክ

እለ ኢፈህምከኒ፤ የለ ኣሰረዩ ግባእ ሕሰርከ ዋዲ ህሌኮ!” ክምስለ ልብሉ ለሀለ እንዴ መስል እብ ዕንታቱ ወዘነቡ ከትሐዩ።

ዶክተር እብ ኣለትለ ምን ኣዳም ሕድት ለናቅሰት ምኑ ከልብ እግል ልትሻቀል ኣምበተ። እብ ከብዱ ህዩ፡ “ኣዳም እንዴ ነክሻ ወሰርቀ ለባዕሉ ዛበጠዩ ከትዳገነዩ ገብእ፡ ወለ ለበዐሉ ዲብ ኣካን ሐቱ ኣዳም እንዴ ቀትለዩ ኣሰኩ መርሐኒ ሆ’ሉ፡ ወለ እንዴ ዘብጠ ወትዘበጠ ራድኢት ሰፋፍ ወዘኑድ ለሐዜ እግሉ ሆ’ለ ገብእ፤” ለኣለት ዲብ ሕድ ተሐባለከት ምኑ። ምናተ፡ እሊ ከልብ እሊ እበ በዲር ለለኣምሩ ኣደቡ፡ ምን ባዕሉ ክም ኢልትፈንቴ ለኣምር ዐለ። ለኣለት ለተኣሰክብ ሰበት ኢዐለት ለዶክተር፡ እብ ሰብብለ ከልብ ምን ሸቁል እንዴ ኣዝመ ሸቀላት ሌጠ ፈ’ረ ወዓዩረ። እግል ኖሱ ክልኣት ነፈር እንዴ ገብኦ ትሰኣለ ወበልሰክ እግል ኣርወሐቱ ትፋረደ።

ደሚሩ ሰበት ኢኣሰከበዩ ህዩ “ረኢኮ ኣብዴኮ ተኣክዩ ኣለበ! ላኪን ኣሰር ሚርሐት ከልብ እግል እግባእ፤ ወምን እገብእ ህዩ ሚትነቅስ ምንዩ፤ ወለ ሐበት” እንዴ ቤለ ጎማቱ ከለሰከ፡ ለግማመት እግል ልትዳገን ላብሉ ለዐለ ልባስ ርሶሕ እንዴ መልጠጠዩ ምኑ፡ ኣሰርለ ዐዙመት ቀዱም ዲቡ ለዐለ ከልብ ከርተፍ! ቤለ።

ትተላሌ-----

“ለገርበት ኢትበልሰ ወለ ህሌት ኢተኣከልሰ”

ቴርኔ ለትብል ዘዐት፡ ዲብ ዓዳት ትግረይት፡ እት ዘበን ቅዱም ለዐለት፡ ዮም ላኪን ለበዴት ዓደት ምርዲናተ። ምናተ ለዘዐት ኖሰ ኣሰክ እለ መክሐ’ደ ለብዲብ ትመስል። እግልሚ፡ ሰርም ገሌ መዳግመት “ቴርኔ” በህለት እት ፍንጌ ሳልሳይ ለኣለበም ክልኣት ነፈር ለትገብእ መክሐ’ዳተ ልብሎ እንዴ ህለው፡ ሰርም ገሌ ላኪን፡ ቴርኔ እንዴ ኢትገብእ፡ ለመርዓዊ ለመርዓቱ ሚ ክም ቴለቱ ለውላድለ ረብዐቱ ሰበት ልትሰኣሉ፡ “ክእነ ቴለኒ” እንዴ ቤለ ሰበት ለኣሰኣል፡ ለራትዐት ተርጀመተ “ቴለኒ”ተ ልብሎ።

ዘበን በዲር መርዓውዮታት ምን ምዕለ ህዳዮም እት ሳብዕ ኣምዕሎምቲ ቤቶም ለኣቱ ለዐለው። ዮም ላኪን ምን ላሊለ ኣምዕለ ሰልፍመ ትሸፍግክ ኣርወሐትክ ዲብ ኣደሓለ ኣምዕለ ሰልፍ ትትናተል ምንከ። እተ መጽኣት ለኣይሰነ።

ለናይ ዘበን በዲር መርዓዊ እተ ኣምዕለ ሳብዕቱ፡ ለማዛዩ እንዴ ኣታቡ እዴለ መርዓቱ ለኣጸብጡክ “ሞራክ እት እዴክ ወኣርዌክ ሐንቴክ” ልብሎ። ለመርዓት ላኪን እለ ምዕል እለ ላሊ እተያተ ክምሰልተ ሰበት ተኣምር፡ ለማዛይለ መርዓዊ ምን ቀደም ውድቀት ጸሓይ እንዴ ኣምበተ፡ እተ ለመርዓት እግል ትህረብ እቡ ለትቀድር ኣግቡይ ምን ጽባቤሕ ዐሳክሩ ሰበት ከሰእ ዲቡ፡ ሕላሌ እንዴ ከርዐተ እዴህ ኢህበት ምን ገብእ፡ ምድር ሐቆ ጸልመተ ለቤት ተሀርብ ምናኩ፡ እት ምስክበ ቅልወት ንጻፋ እንዴ ጤመት ብላዩ ተኣለብሰ ከተሐድገ እግሎም ነብረት። እንዴ ትወጸዐት ዲብ ቤት ጸንሐት ምን ገብእ ህዩ፡ ለውላድለ ረብዐት፡ እንዴ ትጫፈረው ለቴርኔለ መርዓት ወለመርዓዊ ለኣተንሱ ልትመዩው። እለ ላሊ እለ መርዓዊ መርዓቱ እግል ለኣንቅም ወእበ ለትበልሰ ዲቡ ህግዩ መግለለ ወዕቅለ እግል ለኣምር ሰበትቡ ስካብ ኣለቡ። ኣንቀመዩ ምን ገብእ ልትወወት ወሐለለቱ ምን ገብእ ህዩ፡ ውጽዔ ትክርዑ ወላሊ እምበል ፍሬ ትጸቤሕ። ላኪን እሊ መርዓቱ ለኢኣንቀመ መርዓዊ ሐሬ፡ ለሰናቱ ቀቡቡ ልብሎ።


ከመደት ሐቱ ኦሮት መርዓዊ፡ ኣምዕል ሳብዕቱ ሰበት ዐለት፡ ማዛዩ እዴለ መርዓቱ እንዴ ኣጽብጠዩ ክራርም ከረ ዲቦም ወፈግረ ምናም። ለመርዓዊ እግል መርዓቱ ለለኣነቅም እቡ ኣብሳር ባሰር እንዴ ትመዩ፡ ደለ እበ ጀረባክ ሕላሌ ክም ከርዐቱ፡ ባካት ጽቤሕ ምድር ሐቱ ዘዐት ምን ልብለ ክም ትነቅሙ ሰበት ተኣከደ፡ ለምርዓቱ ሸሪፈት ነዲፈት ወኣርወሐተ ወሕሽመተ ለኣክበት ክምሰልተ እንዴ ለኣምር እግል ለኣርቀ እንዴ ቤለ “ከግድም ወለት ሰኢ ሱብ፡ ለጽባብትለ ወራዚትኪ ቅረበናበ!” ቤለዩ፡ ለመርዓት መስኪነት ክምስለ ለእግል ሰኣዩ ካህላተ ሰበት ትከለሰት “ለገርበት ኢትበልሰ ወለህሌት ኢተኣከልሰ” ቴለቱ ልትበህል።

በዐል ሻም

መኒነ እኪት ኢሰሚዕ በዐል ሻም ምንመ ንትደኣሉ ህጅኩ ምንዲ ነሐዜ ክልመት ሰኔት እምብሉ በዐል ሻም ለኣኬ ወሰኔ ዘዐት እኪት ትከልሉ ጥዕም ትግብእ ወመራር በዐል ሻም ኣማን ትመስሉ ፈታይ ኣከ ምን ገብእ በዐል ሻሙ ልክህሉ ወፈታይ ሰነ ምን ገብእ ሰኔት ብዝሕት ተኣሰትህሉ ምንዲ ልትበኣስ ምስልክ እት ማሕበርክ ትደክሉ ወሬሚካ ምን ገብእ እብ ልብክ ወዕንክ ተኣውዕሉ ፈታይ ምንመ ትፈርሁ ወብዞሕ ምንመ ትከጅሉ ደለ ህጅክ ወዕሬ ምስጢር ልብክ ተኣሰኣሉ በዐል ሻም ግሁፍ ኢኑኒ ገጽ ፋሬሕ ለኣክሉ ፈታይ እኪት ኢፈቱ ሐቱ ክልመት ትሻቅሉ ለዘዐት ክሉ ለኣብዩ በዐል ሻም ህተ ትቀትሉ።

ገርብክ ልግብእ ወማልካ እግል ፈታይክ ተሐልሉ ምን ረቢ ትጽብጠክ በዐል ሻም ሐቆ ተህም’ሉ ወእብ ኣዳም ለዐሬክ ፈታይ ሐቆ ትጅህሉ ክልመት ሰኔት እግል ፈታይ ምን ሰናቱ ትወቅ’ሉ ወዘዐት እኪት እግል በዐል-ሻም ልቡ እት ሰመ ትሰቅ’ሉ እምበል ሞት ወሐዮት ሐኪ ይህሌት ተሐልሉ ፋቲ እቡይ ክቡዳ፡ ፋቲ ቅቡብ ክልሉ።

ሙደርስ ሰሌማን መሓመድ ኣድም



ፈሪቅ ሳወ ሻምፕዮን ጅግረ ሾሊሾል አቅሊም ምግብ



እት ሚዳን ቦቻፊለ አስመረ ለጉብኣ ጅግረ ሻምፕዮን ኩረት ሾሊሾል አቅሊም ምግብ ፈሪቅ ሳወ እግል ፈሪቅ ዐንበርቡብ እንዴ ቀልበ ሻምፕዮን ጅግረ ሾሊሾል አቅሊም ምግብ ክም ጉብኣ ትወደሐ።

እሊ ጅግረ እሊ እግል ክልኡት ለፈሪቅ 25 እብ 22 እት ሚርሒት ደርብ ሕድ ሰበት ዐለዩ ምህመቱ ዐባይ ዐለት።

ክልኡቱ ለፈሪቅ እግል ልትዐወት እንዴ ቤለ ናይ ህጁማት ወመዳፍዐት እብ ብዝሒ ለትረኣ እቱ ዐለ። ፈሪቅ ሳወ ምን አክራይ ከዋ (back court attack) እንዴ ትበገሰ ወድዩ ለዐለ ህጁማት ሰማሽ ምን ግሩም ዶርሊ ፈሪቅ ዐለ። እብ ድዱ ፈሪቅ ዐንበርቡብ ምን ናይ በዲር መቅደረቱ እንዴ አንቀሰ ሰበት ቀርቡ። ለበክት ዐውቱ አስክ ፈሪቅ ሳወ ትደለለ።

እት ሰልፍለ ትልህዩ ለዐለት አወላይት መርሐለት 25 እብ 18 ወእት ካልኣይት መርሐለት (ሴት)ለ ትልህዶመ ፈሪቅ ሳዋ 25 እብ 23 ቀልቡ።

እት ናይ ደንገበ መርሐለት ከማን ፈሪቅ ሳዋ 25 እብ 23 ሰበት ቀልቡ። እብ ጀምሶ 3 እብ 0 እግል ፈሪቅ ዐንበርቡብ ሰበት ቀልበ መጃገረት እንዴ ኢተምም ሻምፕዮን ክም ጉብኣ አትአመረ።

ፈሪቅ ዐጀላት ኤረትሮፕ ሕጎል ሚርሒት አፍሪቀ ተአልበጠ

መሕበር ጅግረ ዐጀላት እዲነ ዩ.ሲ.ኣይ እትሊ አደም ቅሩብ እት አፍገረዩ ደረጃት ፍረቅ ዐጀላት አፍሪቀ ክምሰልሁመ ደረጃት መተልህዩት እበ ትክስስ ሐብሬ። ኤረትሮፕ እብ ደረጃት ፈሪቅ እብ 1,645 ንቅጠት 1ይት ወመትጃግራይለ ፈሪቅ ሚሮን ኡብርሃም እብ ናይ ብሕተ ሕጎል ሚርሒት ዳብጣም ህለው።

ግረ ኤረትሮፕ 2ይት ደረጃት ዳብጠት ለህሌት ዐድ መሮኮ እት ጉብኣ። እብ 1042.5፣ 3ይት ደረጃት ህዩ። እብ 973 ግብለት አፍሪቀ ዳብጠተ ህሌት። ሚሮን ኡብርሃም እብ 344 ንቅጠት መትጃግረቱ እንዴ ሔሰ እብ ንቃዋ መሬሕ ለህለ።



ዋ ፈረሕ አዜመ እት ጅግረ

እትሊ ሄለሉ ዳብጣም ለህሌነ ወሬሕ አጎስት ምን ዮም 4 አስክ ዮም 13 ለልትዳሌ ጅግረ ሻምፕዮን አትሌቲክስ እት ጅግረ ዙሪክ ጀላብ እግል ልሻርክ። ዋ ፈረሕ ምን ጅግረ ትራክ እግል ልሻርክ ክም ቱ ሸርሐ።

ሐምሰ ዶል ሻምፕዮን ዐለም ለጉብኣ አስል ሶማል ለቡ ወድ እንግሊዝ ላቱ ዋ ፈረሕ። እት አሉምፕዶት ዐለም ዲብ ሻርክ ወልትዐወት። እት ዮም 20 አጎስት ህዩ። እት ለንደን በርሚንግሃም ለጉብኣ ጅግረ ዲያሚንድ ሊግ እት ናይ 3,000 ምትር እቱ እንዴ ሻርክ ምን እሊ ጅንሰ ጅግረ እሊ እግል ልትሳራሕ ክምቱ ሻርክ ምንመ ዐለ። 4 አምዕል እንዴ ወሰከ እት ዮም፣ 24 እት ሰዊዘርላንድ ለጉብኣ ጅግረ እቱ እግል ልሻርክ ክምቱ መዳልየትለ ጅግረ እኩዳም ህለው። ክሉ እህትማሙ እት ጅግረ ጽርግዩ ወመራቶን እንዴ ሀበዩ ከድም ለህለ ወድ 34 ሰነት ላቱ አትሌት ዋ ፈረሕ። እት ጅግረ አትሌቲክስ ለንደን እት ጅግረ 5,000 ምትር ወ10,000 ምትር ጅግረ እግል ልትዐወት እቱ ክምቱ እብ ደማነት እግል ልሻርክ እቱ ቱ።

ሀደፋ ተመ እግሉ ምንገብእ ህዩ። እብ ትሉሉይ እግል ሰለስ እዋን እትለ ሬመው ጅግራታት ትራክ ለትዐወተ አትሌት እንዴ ትበህለ እግል ልትሰሚቱ። እግል ጅግረ ንሃዩት ዲያሚንድ ሊግ ልትዳሌ ለህለ አትሌት ዋ ፈረሕ ጅግረ ትራክ እብ 5,000 ምትር እግል ልትሳራሕ ምኑ ክምቱ እኩድ ህለ። ሐምሰ ዶል ሻምፕዮን አርብ እግል ልግበእ ለቀድረ አትሌት ዋ ፈራሕ። ግረ ሰነት 2012 ምነ ጉብኣ ጅግራታት አስክ እለ ቅሉብ ኢለአምር።



አትሌት ግርማይ፡ ምን አትሌቲክስ ለንደን ቀይብ



ለምን ዮም 4 አስክ 13 አጎስት እት ለንደን ለጉብኣ ጅግረ አትሌቲክስ ዐለም እቱ እግል ልሻርክ መዳላዩ እትመም ለህለ ፈሪቅ አትሌቲክስ ኤረትሮፕ እት አርበዕ ጅንሰ መጃገረት በህለት 3,000 ምትር ሰቴፕል ቼይሴ፣ 5,000 ምትር፣10,000 ምትር ክምሰልሁመ እት መራቶን እግል ልሻርክ ቱ።

እሊ እብ ሚርሒት መደርቢን ለፈሪቅ ዳንኤል ወልደዬሰሰ ወእሲዮስ አሰፋው። እት ጅግረ 5,000 ምትር እብ አትሌታት ዐወት ሀብቱ ወኣሮን ክፍሉ። እት 10,000 ህዩ አትሌታት ንጉሴ


አምለሶም፡አሮን ክፍሌ ወሀዝቅያስ ተወልዴ እት 3,000 ምትር አትሌት ዮማኔ ሃይሌሰላሴ ወእት ጅግረ ማራቶን ህዩ አትሌት ዮውሃንስ ገብሬ ገርጊሽ እግል ለህሉ ቱ።

እት ጅግረ መራቶን ዐለም ሰነት 2015 ዕወት መዳልየት ደህብ ለጉብኣ አትሌት ግርማይ ገብሬሰላሴ እብ ሰቡበለ እት እግሩ ለሳደፈቱ ብቀት አፍካክ እትሊ ናይ ዮም ዓመት ጅግረ እግል ለህሌ ኢኮን። እግል ሳምኖታት ብዙሕ ወአስክ ከረ ሆላንድ እንዴ ጌሰ እግል ልትሳራ ወመሻረኩቱ እግል ለአክድ ኬን ወእንሰር ለቤለ አትሌት ግርማይ

እግል ልሻርክ እብ ኢቅድረቱ ሐዘን ምንመ ትሰምዐዩ። እት ጅግረ እግል ልሻርክ ሕሩይ ለህለ ፈሪቅ ሐዋን ክም ኢኮን አከደ።

እብ ዓመት እትሊ ጅግረ እሊ ምን 205 ደውለት ለመጸው 2,034 አትሌታት እብ ክልኡቱ ለጅንሰ እግል ልሻርኮ ቱ። ኤረትሮፕ እትሊ ጅግረ እሊ እብ አንሳት እግል ትሻርክ ክም ኢኮን ለበጽሐተነ ሐብሬ አከደት።

ፈሪቅ አትሌቲክስ ኤረትሮፕ እት ዲብ ብሪጣንዩ ለጉብኣ ጅግረ አትሌቲክስ እግል ልሻርክ ዮም አርቦዕ አስክ ለንደን እግል ልሳፍር ቱ።



ሽዑብ ወዓዳቱ



እት ለገብአት ደውለት ትሳፍር እት ህሌክ ዓዳት ወቃዊኒን ናይላ ደውለት እግል ተአምር ሰኒ ምህምቱ፡ እግልሚ ምን ለትፈናተ አሰፍ ሰበት ለአድሕነኩ፡ እግል መሰል ገሌ ምን ለመድ ወቃዊኒት እት ለትፈናተ ድወል ምን እንርኤ፡-

እት ሲንጋፖር እት ምድር ጥፍአት፡ እት አካነት ሽዑብ ለልትጀመሪ እቱ ብልዐት ወመጨር ማሰቲከት እብ ቃትን ለአጸብጥ፡፡

እት ጃፓን ህዩ ዕዳይ አው ቲፕ ሂበት ወእት ሽዋርዕ

መትሐቃፍ ወለ ናይ ሰላም ዓድዮት መምኑዕቱ፡፡

እት ዐለምን እብ ያንዲን ወአዋዓሚቶ ለልትሌለው ሚክሲክዩን ቶም፡፡

እት ሻዋርዕ ኒውዚላንድ ብዝሓም አንፋር እብ ሓፊሆም ገይሶ ሐቆ ረኤክ ኢትትዐጀብ ሐቆ ቀደርክ ክምሰልሆም እብ ሓፊክ ትዳወር፡፡ ምግያስ እብ ሓፊ እት ለመዶም መዐነትብ፡፡ በህለት ለእት ምድር ልትረከብ መዓድን እብ እገርክ እት ክሉ ገርብክ ልሐልፍ ለልብል ፈሪም ሰበት ሀላቱ፡፡

እት ዐድ እንግሊዝ ሪገት ሐሊፍ ወምን ማህዩት አዳም መትሰአል መምኑዕቱ፡፡

እት ጀርመን ገጽክ አዳም ኢትግነሕ እግልሚ እብ ቃትኖም መምኑዕቱ፡፡

ማሊዥዩን እት ክፋላት ገርብ ወድ በኒኢደም ረኤስ ለቀለ ወለ ትባረክ ክምቱ ሰበት ለአምኖ እግል አዩ ነፈር እት ረኤሱ ተምተሞት ወክሱሰን እግል አጀኒት መምኑዕቱ፡፡

እት ኮርዩ ግሩሽ ተህይብ እት ህሌክ እብ ክልኤ እዳክ እግል ተህብ ብከ፡፡

እት ሩሰዩ እት ቀበት ቤት እንዴ ገብእክ ሰፈርት መምኑዕቱ፡፡ እግልሚ ክም ናይ ሼጣን ሰበት ልትነሰእ፡፡

መስርዩን እት ገበዮም እስእን ግልብት ሐቆ ጸንሐቶም እንዴ ይሀረሰው ኢለሐልፎ፡፡

እት ብዙሕ ደዋይሕ ቱርኪ ወህንድ ሐቆ ውድቀት ጸሓይ፡ አጫፈርክ ነወኮት ፋል ሕማም ወሕግላን ክምቱ ልትአመን፡፡

ኡዳወሮት ሽዕር

እት እንቲ በርሀት
ሚልከይት ጽልመት
እት እንቲ ዕዛል እት ቀበት ገርሀት
እት እንቲ ሰጀዕ ድድ ናይ ፈርሀት
እግልሚ ትብሊ ሐገልኮ ሐሊት?
ወለትረሰዐኪ ዒን ናይ ሐሊት ክምተ ወለት?
አይወ እግልኪቱ አንሳይት ለይአዳወርኪ እትሰት

ክም አንሳት ሀለዩ አፍካር ለቀየረዩ
ክም ከለ ማርዩ ትሬዝ ረሐመት ለዘርአዩ
ክም ከለ ናዚንገ ሽዩም ለአድነዩ
ክም ከለ መርዩ ፈልሰፈት ለአሰበቀዩ
ክም ከለ አምነ ወመርዩም አንብዶ እወልደዩ

ክም ቤለተኒ ለእዬ መሰል ላኪን ምንዬ ለተሐይሰ አንሳይት
አክጀሌኒ አፍካርዬ ወእት ርሕዬ ገብእኮ ጋሻይት
ለፈቱክ በደል ዓሰ ለሀይበክ
ገበይ ጅልቡቱ ለአርኤክ
ለትብል መሰል ቻይነ
እብ ፍዕል አርኤተኒት እለ ናይ ሐዶቼ እድንዩ

ሐል መሸከለቼ እት እዳዬ እት እንተ ሐል ምን ብዕዳም ሐዜ
እግለ ክም ዐልኮ
ምን በሊስ እለ ናይ አማን አንሳይት እግል እፍሀም ቀደርኮ
ምን ነቢር እት ተምሰል ዮም እት ርሕዬ አቅበልኮ
አቤ ዮም ርሕዬ አመርኮ
ፍርሰ ሰዒደ!!

ሰወር ወቅሰሱ



እብ ዐመልክ አበልበሎት እብ ለትፈናተ አሰሉብ ልትጋዩሰ፡፡ ከእግል ዮም አበልበሎት ኖሰ እት ወላድ ቲበት ከፎ ክም መሰል እትለ እት ለዐል እንርእዩ ለህሌነ ሱረት ነአዳውረ ። ላኪን ዝያድ ተውድሕ ምን ሀይበኩም ሚከፊ ምንኩም፡፡ እብ አሳሰ ለመድ ቲበት፡ አዩ ነፈር እት ሐያቱ ምን ልውሕድ ሐቱ ዶል፡ “ሳህ” ለልትበህል ግያስ እገር እግል ልውዴ ህለ እግሉ፡፡ እለ ራሐት ደሚር ወፍቲ ወእሕትራም አዳም ለለሀይብ ለመድ፡ እት ሐናት ከረም ወልሐቲ ገብእ፡፡ እለ መግዕዝ እምነት ክመ እት ሱረት እንርእዩ ለህሌነ አሰሉብ እቡ እግል ዐስርታት ኪም ልትጋዩሰ፡፡ እት ሕዳዳት ከመዋት ህዩ ሰጅድ ወእት አዳም ለህለ እግሉ እሕትራም ለአርኤ በህለትቱ፡፡



እሎም እትለ ሱረት እንርእዮም ለህሌነ አጀኒት ቀቢለት ሂምባ ገብእ እት ሀለው፡ እግል አወል መረቶም ምስል ሐለዋት ሲሞ ልትአመሮ ሀለው ። ለሐዋት አሮት ሙሰውር ናሽናል ጂኦግራፊ አምጸዩ እግሎም፡፡ ላመ አጀኒት ይሐምቀው ሐቆ ናይ ደቃይቅ መትመራማር ፈትሐወ ወለዘለተ እግል ለአዳውሮ አንበተው፡፡ ለለአትፈክር ላኪን እግል ሐለዋት እብ ኢፍትዮቶም ቱ፡፡

ሰደፍ ቱ ገብእ?

• ደረሰ ቤት ክሰታን
ዌስትሳይድ ፓፕ ቲስት
እት ኔብራስክ፡ ክልዶል ዮም አርቦዕ ሳዐት 7:20 ናይ ምሴ እት ወጃቦም እንዴ ትራከበው አመት ድራሱቶም ወዱ ዐለው፡፡ ዮም 1/3/1950 ፡ ሳዐት 7:25 ናይ አምሱይ እት ከኒሰት ጋዝ ሰበት ሰግ ለከኒሰት ነደት፡፡ ላመ ደረሰ ደርሶ እት ለዐለው ቤት ሐቱ እንዴ ኢተርፍ እት ነደት፡፡ ሰድፈት ላኪን እብ በክት ምን ደረሰ ለሞተ ነፈር ኢዐለ፡፡ ለሰብብ ነገፎም ህዩ፡ ክሎም ለደረሰ እብ ብክት እት ሰዐት ወጃቦም ሰበት ኢመጸውቱ፡፡ በክትቱ ገብእ መስደፍ?

• ክብሪ ሆሽር ልትብኔ እት ሀለ፡ በህለት20/12/1922 ጂ ተርኒ ለልትበህል ነፈር እንዴ ወድቀ ክም ሞተ ፡ አሰሩ 112 ሸቃለ ርሐም ሐግለው፡፡እለ እብ ትሉሉይ ሞት ሸቃለ ሐቆ 13 ሰነት ገብእ እት ሀለ፡ እት 20/12/1935 ለሞት አክተመት፡፡ ምን ክሉ ለለአትፈክር ላኪን እትለ አክረይት ዕለት አክር ለሞተ ሸቃላይ፡ ፓትሪክ ጂ ልትበህል በህለት ወልዱ እግል ለሞት ለ አ ስ ተ ብ ዴ ት እቡ ጂ ተርኒ፡፡

ክእኒመ ህለ ጸርነ?

መሐመድ ሱብሐ ለልትበህል ሸቅል ለይአለቡ መሰሪ ላቱ ሻብ ፡ እት ሽዋርዕ መዲነት ካይሮ ጡን- ጡን እት ልብል እግለ ረክበዩ ወለት ለአትፋርህ ወግሩሽ ዘምት ምነ ዐለ፡፡ ቀደም ሳምን ላኪን መሐመድ ምን እለ ሸቅል እኩይ ክም ረይም ለወድዩ ረድ ፍዕል ረክበ፡፡ ሐቱ ምሴት መሐመድ ክም አመሉ እት ለአትጫፍር ሐቱ ወለት ረኤ፡ ህቱ ንዮቱ ሰበት ረክበ እግል ለአትፋርህ አንበተ ። ለቅንጭብት ላኪን እት ደቃይቅ ለኢነሰኦ ወቅት እብ ከራቱ ተውሊደቱ አተዐሰቱ፡፡ ለእት ከራቱ ሕዛም ቀይሕ ለበ ወለት ገርቡ ሳበረት ወገጹ ጨፋለቀት ምኑ ከዩም ሸቅለ ገብእት፡፡ መስኪን ሰራቅ ሰኔት ዲማተ ወመእከይ ሐቱ አምዕል ለትብል መሰል ቀዳምያም እብ ፍዕል እት ርሐ እግል ልርአዩ ትቀሰቡ፡፡

5 ፍንቲት እለን ሰወር ርክቦ

